

यूहन्नायात जूगु प्रकाश

म्हसीका

थाय्थासय् च्वंपिं विश्वासीतय्त दुःखकष्ट वयाच्चंबलय् यूहन्नां थ्व सफू थःत जूवःगु दर्शनया बारे च्वःगु खः। यूहन्नां थ्व सफू विश्वासीतय्त आशा व साहस बीत, अले दुःख व सास्तीया इलय् नं विश्वास याये बहःपिं जुयाच्चवनेगु इनाप यायेत च्वयातःगु खः। उबलय् यूहन्नां परमेश्वरयागु वचन व येशू धयादीगु सत्य खः धकाः न्यंकाच्चंगुलिं पत्मोस टापुइ यंकाः कुनातःम्ह खः।

सफूया अप्वः धयाथें थासय् यूहन्नां थःत जूगु दर्शनया खँ कथंहंक व चिन्हय् क्यनातःगु दु। उबलय्यापिं विश्वासीतय्सं थ्व दर्शनया अर्थ बांलाक थू। मेपिन्त धाःसा थ्व छगू गुप्ति खँ जूगुलिं थुइके थाकु।

सफूया मूखँयात संगितया लय थें थाय्थासय् थी थी दर्शनया रूपय् दोहरय् यानातःगु दु। थ्व दर्शनया अर्थ थी थी मनूतय्सं थी थी कथं ब्यूसां मूखँ ला बांलाक हे सी दु — परमेश्वरं येशू ख्रीष्टया पाखें वय्कःया दक्व शत्रुतय्त व शैतानयात नापं सदांया निंतिं भज्यंक नाश यानादी। अले थः विश्वास याये बहःपिं मनूतय्त जक वय्कःयागु न्हूगु स्वर्ग व न्हूगु पृथ्वीइ दुकयादी।

धलः पौ

| | |
|---|------------|
| न्ह्यखँ | १:१-८ |
| न्हापांगु दर्शन व न्हय्यू मण्डलीयात छ्वःगु पौ | १:६-३:२२ |
| न्हय्यू छाप तयातःगु भ्वंथू | ४:१-८:१ |
| न्हय्यु तुरही | ८:२-११:१६ |
| अजिङ्गर व निम्ह पशु | १२:१-१३:१८ |
| थी थी दर्शन | १४:१-१५:८ |
| परमेश्वरयागु तंयागु न्हय्युः ख्वल्चा | १६:१-२१ |
| बेबिलोनयागु विनाश, पशु, फताहा अगमवक्ता व शैतानयागु विनाश | १७:१-२०:१० |
| दकसिबय् लिपायागु न्याय | २०:११-१५ |
| न्हूगु स्वर्ग, न्हूगु पृथ्वी, न्हूगु यरूशलेम | २१:१-२२:५ |
| क्वचाय्कूगु | २२:६-२१ |



पत्मोस टापु

प्रकाश

१ श्व सफुलिइ च्वयातःगु खँ
 परमेश्वरं येशू ख्रीष्टयात क्यना-
 दीगु खँ खः। थः दासतय्सं छु
 जुइतिनि धयागु खँ थुइके फयेमा
 धकाः परमेश्वरं येशू ख्रीष्टयात क्यना-
 दीगु खः। येशू थ्व खँ क्यनेत छम्ह
 स्वर्गदूतयात यूहन्नायाथाय् छ्वया-
 दिल। २व हे यूहन्नां खंगु परमेश्वरं
 धयादीगु वचन, अले येशू ख्रीष्टं
 धयादीगु खँ फुक्क सत्य खः धकाः
 साक्षी बियाच्चनागु दु।

३ई न्हाःने थ्यने धुंकल। उकिं थ्व
 अगमवाणीयागु वचन ब्वंपिं, न्यंपिं,
 व मानय् याःपिं मनूत धन्यपिं खः।

न्हय्गू मण्डलीयात यूहन्नाया ज्वजलपा

४एशियाय् दुगु न्हय्गू मण्डलीयात
 यूहन्ना पाखें ज्वजलपा।

आः नं दीम्ह, न्हापा नं दीम्ह,
 अले भायादीत्यंम्ह, व वय्कःयागु
 सिंहासनयागु लिक्क च्वंपिं न्हय्म्ह

आत्मा पाखें छिमित दया माया व शान्ति दयेमा।* ५अथे हे तुं साक्षी बियादीगु विश्वास याये बहःम्ह, सिनाः दकलय् न्हापां म्वाना वःम्ह, अले संसारय् च्वंपिं जुजुतय् जुजु येशू ख्रीष्ट पाखें नं छिमित दया माया व शान्ति दयेमा।

भीत माया यानादीम्ह नं वय्कः हे जूगुलिं थःगु हिं भीत भीगु पापं छुतय् यानादीम्ह नं वय्कः हे खः।* ६वय्कलं परमेश्वर बाःयागु सेवा यायेत धकाः भीपाखें पुजाहारीतय्गु छगू राज्य स्वनादिल। येशू ख्रीष्टया न्हाबलें महिमा व आदर जुया च्वनेमा। आमेन!*

७“स्व, वय्कः

सुपाँचय् भायादीतिनि,
फुक्कसिगु मिखां खनीतिनि,
वय्कःयात
भालां सूपिन्सं नं खनी।
अले संसारय् च्वंपिं
फुक्क जातयापिं मनूत
वय्कःयात खनाः
नुगः दादां र्व्वय् मालीतिनि।
थथे ला जु हे जुइ। आमेन!”*

८दक्वसिबय् तःधंम्ह व शक्ति दुम्ह, आः नं दीम्ह व न्हापा नं दीम्ह, अले भायादीम्ह परमप्रभु परमेश्वरं धयादिल — “अल्फा व ओमेगा जि हे खः।”*

येशू ख्रीष्टया दर्शन

९छिपिं लिसे येशूयागु नितिं दुःख-कष्ट सिया च्वनाम्ह छिमि दाजु जि यूहन्ना खः। छिपिं लिसे तुं वय्कः-यागु राज्यय् च्वनाः सकतां सह यानाच्वनागु दु। जिं परमेश्वरयागु वचन व येशू धयादीगु सत्य खः धकाः न्यंकाच्वनागुलिं जितः पत्मोस टापुइ यंकाः कुनातल। १०प्रभुयागु दिनय् जि आत्मां जाल। जिगु ल्युने तुरही पुया हःथें तस्सलं थथे धया हःगु सः जिं ताल — ११“छं खंगु फुक्कं सफुलिइ च्वयाः न्हय्गू मण्डलीतय्त छ्व — एफिसस, स्मुर्ना, पर्गामम, थिआटीरा, सार्डिस, फिलाडेल्फिया व लाउडिकिया।”

१२थुकथं जि नाप खँ ल्हाना च्वंम्ह सु धकाः लिफः स्वयाबलय् न्हय्गू लुँयागु त्वाःदेवा जिं खना। १३त्वाःदेवाया दथुइ मनूया काय्

१:४ प्रस ३:१४; प्रका ४:५ १:५ यशै ५५:४; भज ८६:२७ १:६ प्रस १६:६; प्रका ५:१०
१:७ दान ७:१३; मती २४:३०; मर्क १३:२६; लूक २१:२७; १ थेस ४:१७; जक १२:१०;
यूह १६:३४, ३७ १:८ प्रका २२:१३; प्रस ३:१४

थेंज्याःम्ह तुतिइ थ्यंक वःगु पुजा-
हारीया लं फिनाः छातिइ लुँ बाला
हिनातःम्ह छम्हय्सित खना।*
१४व्य्कःयागु छचं व सँ तुयुगु
उन व च्वापु थें तुयु। व्य्कःयागु
मिखा च्यानाच्वंगु मि थें च्वं।
१५व्य्कःयागु तुति मिइ छुया
दायाः तल तल थीकातःगु ली थें
च्वं। अथे हे व्य्कःयागु सः यक्व
क्वब्बाःलःयागु सः थें च्वं।* *
१६व्य्कःयागु जव ल्हातय् न्हय्गः
नगु दु। व्य्कःयागु म्हुतुं तसकं
ज्वःगु निखें धाः दुगु तरवार पिहां
वयाच्वंगु दु। व्य्कःयागु ख्वाः
तसकं थीगु सूर्य थें च्वं।

१७व्य्कःयात खनेवं जि सीम्ह थें
जुयाः व्य्कःयागु तुतिइ भ्वपू वना।
अले व्य्कलं जिगु छेनय् जव ल्हाः
तयाः धयादिल — “ग्याये मते। जि
सुरु व अन्त खः।* १८जि म्वाःम्ह
खः। जि सी धुनाम्ह जूसां आः जि
न्ह्याबले म्वाना च्वनिम्ह खः। मृत्यु
व नरकया ताःचा जिके दु।

१९“आः छं खंगु, जुया च्वंगु खँ,
अले लिपा जुइ तिनिगु खँ फुककं
च्व। २०छं खंगु जिगु जव ल्हातय्
दुगु न्हय्गः नगुयागु व न्हय्गू लुँयागु


त्वाःदेवाया गुप्ति खँ थ्व हे खः।
न्हय्गः नगुयागु अर्थ न्हय्गू मण्डली-
यापि दूतत खः। अथे हे न्हय्गू लुँयागु
त्वाःदेवायागु अर्थ न्हय्गू मण्डली
खः।

एफिससय् च्वंगु मण्डलीयात च्वःगु पौ

२ १“एफिससय् च्वंगु मण्डली-
याम्ह दूतयात थथे धकाः च्वया
छ्व — जव ल्हातय् न्हय्गः नगु
ज्वना जूम्हय्सिगु व न्हय्गू लुँयागु
त्वाःदेवायागु दथुइ जुया च्वंम्हय्सिनं
थथे धयादीगु दु —

२“छिमिसं दुःख सियाः यानाच्वंगु
ज्याखँ, अले सह याये फक्व सह
यानाच्वंगु व मभिंपिं मनूतय्त
छिमिसं दुनुगलंसिनं हे मयय्कूगु,
व प्रेरित मखुसां प्रेरित खः धकाः
धया जूपिन्त फताहा सावित यानाः
क्यना ब्यूगु फुककं जिं स्यू। ३जिगु
नांयागु नितिं छिमिसं सकतां सह
याये फक्व स्वयाः नं अप्वः सह
यानाच्वंगु अफ् हे नं त्यानु मचासे
सह यानाच्वंगु नं जिं स्यू।

४“अयनं छिमिसं जितः न्हापा



न्हापा माया याना जूथें थौं कन्हय् मयात धका: जिं छिमित धाये माल।
 ५ उकिं छिमिसं गनथाय् द्वंकागु खः लुमंका: पश्चाताप याना: न्हापा न्हापा या:थें थौं कन्हय् नं याये माल। मखुसा जि हे वया: छिमिगु त्वा:देवा उकिया थासं लिकया बी। उकिं छिमिसं पश्चाताप याये हे मा:। ६ अयुंनं निकोलाइटसतयगु ज्याखँ छिमिगु दुनुगलंनिसें हे मय:गु ला बां हे ला:। जित: नं इपिं मय:।
 ७ “सुयाके न्हायुपं तु वं आत्मां मण्डलीतयत् छु धयादिल धयागु

न्यना: थुइका: का — त्याका व:पिन्त जिं परमेश्वरयागु स्वर्गय् चवंगु जीवन बीगु सिमायागु फल नकेबी।*

स्मुर्नाय् चवंगु मण्डलीयात चव:गु पौ

८ “स्मुर्नाय् चवंगु मण्डलीयाम्ह दूत-यात थथे धका: चवया छ्व — सुरु व अन्त, अले सिना: म्वाना व:महय्सिनं थथे धयादी — *

९ “छिमिसं कष्ट फयाचवंगु व

चीमि जुयाचवंगु जिं स्यू। अयनं छिपिं ला तःमि खः। यहूदी मखुसां यहूदी खः धकाः धया जुइपिन्सं छिमित मभिका जूगु नं जिं स्यू। इपिं शैतान नाप मिलय् जूपिं खः। १०दुःख वइन धकाः छिपिं ग्याये मते। का स्व, शैतानं छिपिं मध्ये सुयातं भ्यालखानाय् कुंका बीत्यंगु दु। थुकथं छिपिं विश्वासय् गुलि बल्लाःपिं खः धकाः स्वयेत्यंगु दु। भिन्हु हे जक छिमित दुःखकष्ट जुइ। सी हे माला वंसां छिमिसं जितः विश्वास यायेगु त्वःते मते, अले छिमित जीवनयागु श्रीपेच बी।

११“सुयाके न्हायपं दु वं आत्मां मण्डलीतय्त छु धयादिल धयागु न्यनाः थुइकाः का — त्याःपिन्त नरकय् छ्वइ हे मखु।* ”

पर्गाममय् चवंगु मण्डलीयात चवःगु पौ

१२“पर्गाममय् चवंगु मण्डलीयाम्ह दूतयात थथे धकाः चवया छ्व — तसकं ज्वःगु निखें धाः दुगु तरवार दुम्हय्सिनं थथे धयादी —

१३“शैतानयागु सिंहासन दुथाय्

छिपिं चवनाचवंगु दु धकाः जिं स्यू। छिमिसं शैतान दुगु थासय् नं जितः क्वात्तुक भक्ति व विश्वास यानाचवंगु दु धकाः, अले जिगु साक्षी बिया जूम्ह एन्टिपासयात स्याःबलय् नं छिमिसं जितः विश्वास यायेगु मत्वःतू।

१४“अयनं जिं छिमित व्वःबी माःगु छुं खँ दु। इस्राएलीतय्त स्यंकेत जुजु बालाकयात खँ स्यंमह बालामयागु बिचाः गथे खः अथे हे याना जूपिं छिमिथाय् नं सुं दु। वं इस्राएलीतय्त मूर्तियागु प्रसाद नयेगु व व्यभिचार यायेगु खँ स्यनाः स्यंकेत स्वल।* १५अथे हे निकोलाइटसयागु खँ स्यना काइपिं नं छिमिथाय् दु। १६उकिं पश्चाताप या, मखुसा जि याकनं वयाः जिगु म्हुतुइ चवंगु तरवारं इपिं लिसे ल्वाये।

१७“सुयाके न्हायपं दु वं आत्मां मण्डलीतय्त छु धयादिल धयागु न्यनाः थुइकाः का — त्याःमहय्सित जिं सुचुका तयागु मन्ना बी। अले छगू न्हूगु नां चवया तःगु तुयुगु ल्वहं छगः नं बी। व काःमहय्सिनं जक थ्व नां थुइ, मेपिन्सं थुइ मखु।* ”

थिआटीराय् च्वंगु मण्डलीयात
चवःगु पौ

१८“थिआटीराय् च्वंगु मण्डलीयाम्ह
दूतयात थथे धकाः च्वया छ्व —
छ्वयाच्वंगु मि थें च्वंगु मिखा दुम्ह,
अले थीगु ली थें च्वंगु तुति दुम्ह
परमेश्वरया काय्न् थथे धयादी —

१९“छिमिसं यानाच्वंगु ज्याखँ,
जितः माया यानाच्वंगु, विश्वास
यानाच्वंगु, सेवा यानाच्वंगु, अले
सह यानाच्वंगु जिं स्यू। छिमिसं
न्हापा न्हापा स्वयाः नं आः तसकं
बांलाक ज्याखँ यानाच्वंगु दु धकाः
जिं नं स्यू।

२०“अय्जूसां जिं धाये माःगु छता
खँ दु। थः थःमहं तुं अगमवादिनी खः
धकाः धया जुइम्ह ईजेबेल धाःमह
मिसायात छिमिसं छुं हे मधासे
तयातल। जिमि दासतय्त व्यभिचार
यायेगु व मूर्तियागु प्रसाद नयेगु खँ
स्यनिम्हय्सित छिमिसं याःयाःथे
याकातये ज्यू ला? * २१जिं वयात
पश्चाताप यायेमा धकाः ई बिया
तया। अय्न् वं याना जूगु व्यभिचार
याये मखुत धकाः मधाः।

२२“उकिं आः जिं वयात उसाँय्
मदय्काः लासाय् प्यपुंकाबी। व
नाप व्यभिचार याःपिन्सं पश्चाताप
मयात धाःसा व नाप तुं इमित नं
तसकं दुःखकष्टय् लाका बी।
२३वया मस्तय्त जिं स्यानाबी।
मनूतय्गु मन व नुगः वातुवालाः
स्वइम्ह जि हे खः धकाः अले
जक फुक्क मण्डलीं सीका काइ।
छिमिसं याना जूगु ज्या स्वयाः जिं
नं छिमित माःगु याये। *

२४“आः ल्यं दनिपिं थिआटीराय्
च्वंपिं वयागु खँय् मजूपिं व
शैतानयागु गुप्ति खँ मस्यूपिन्त जिं
आः मेगु छुं हे कु कुबीके मखुत।
२५आः थें तुं छिपिं जि मवतले
विश्वासय् बल्लाना च्वँ।

२६लिपा तकं जिं धाःथे
यानाच्वंम्हय्सित व
त्याइम्हय्सित
जात जातियापिन्त शासन
याके बी।

२७वय्कलं इमित
नँयागु दण्डीं शासन याइ,
अले चायागु थल
तछ्याःथें तछ्याइ।

जितः जिमि बाःनं ब्यूगु ति हे
अधिकार इमित दइ।*

२८“अले जिं इमित सुथसिगु नगु
नं बी।

२९“सुयाके न्हाय्पं दु, वं आत्मां
मण्डलीतय्त छु धयादिल धयागु
न्यनाः थुइकाः का।”

सार्डिसय् च्वंगु मण्डलीयात
चवःगु पौ।

३ १“सार्डिसय् च्वंगु मण्डलीयाम्ह
दूतयात थथे धकाः च्वया छ्व—
परमेश्वरया न्हय्मह आत्मा व न्हय्गः
नगु दुम्हय्सिनं थथे धयादी —

“छिमिसं यानाच्वंगु ज्याखँ जिं
स्यू। मनूतय्सं छिपिं म्वाना च्वंपिं
खः धकाः बिचाः याइ, अय्न्
धात्थें धाये धाःसा छिपिं सीपिं खः।
२न्हालं चायेका च्वँ, ल्यं दनिगु
खँयात बल्लाका ति। मखुसा याकनं
हे तना वनी। जिमि परमेश्वरया न्ह्यःने
छिमिसं याना जूगु ज्याखँ बांलाः मजू
धकाः जिं स्यू। ३छिमिसं न्यनागु व
सयेका कयागु वचन लुमंका ति।
वचनयात मानय् या, अले पश्चाताप

या। छिपिं न्ह्यलं चायेका मच्वंसा जि
खँ वःथें वये। जि छिमिथाय् गुबलय्
वइ धकाः छिमिसं सी मखु।*

४“अथेसां सार्डिसय् गुलिखय्
मनूतय्सं थःगु लं यचुकातःगु दु।
थुपिं तुइसे च्वंगु वसतं पुनाः जि नाप
जुइतिनि, छायाःसा थुपिं जि नाप
जुइत ल्वः। ५थथे त्याःम्हय्सित
जिं तुयुगु वसतं पुंका बी। अले जिं
वयागु नां जीवनयागु सफुलिं गुबलें
हुयाछ्वये मखु। जिमि बाःयागु
न्ह्यःने व वय्कःया स्वर्गदूततय्गु
न्ह्यःने जिं थ्व जिम्ह मनू खः धकाः
धाये।*

६“सुयाके न्हाय्पं दु, वं आत्मां
मण्डलीतय्त छु धयादिल धयागु
न्यनाः थुइकाः का।

फिलाडेल्फियाय् च्वंगु मण्डलीयात
चवःगु पौ

७“फिलाडेल्फियाय् च्वंगु मण्डली-
याम्ह दूतयात थथे धकाः च्वया
छ्व —

पवित्रम्ह, धात्थेंयाम्ह,
दाऊदयागु ताःचा दुम्हय्सिनं
थथे धयादी —

गुम्हय्सिनं चाय्कूगु खापा सुनानं
ती फइ मखु,
अले तिना ब्यूगु खापा चाय्के
फइ नं मखु।*

८“छिमिसं यानाच्वंगु ज्याखँ जिं
स्यू। स्व, जिं छिमिगु न्ह्यःने लुखा
चाय्का बियागु दु। थ्व लुखा सुनानं
ती फइ मखु। छिपिं यक्व शक्ति
मदुपिं मनूत खःसां जितः त्वमतुसे
विश्वास यानाच्वंगु दु धकाः जिं
स्यू। ९स्व, यहूदीत मखुसां यहूदीत
खः धकाः मखुगु खँ ल्हाना जुइपिं
शैतानयागु बाखं कनिगु छैय् मुनि-
पिन्त जिं यायेगु स्यू। स्व, जिं इमित
छिमिथाय् छ्वया हयाः छिमिगु
तुति भागि याकेहये। अले जक जिं
माया याना तयापिं मनूत छिपिं हे खः
धकाः इमिसं सीकी।*

१०“छिमिसं न्ह्यागु दुःखकष्ट सह
याना नं जिगु वचन मानय् यानाच्वन।
उकिं जिं नं छिमित संसारय् च्वंपिं
फुक्कसितं जाँचय् यायेत जूवइगु
दुःखकष्टं बचय् याये। ११जि याकनं
वयेत्यनागु दु, उकिं छिमिके दुगु
त्वःफिके मते। अले जक छिमित
बीगु श्रीपेच सुनानं लाकाकाये

फइ मखु। १२त्याःम्हय्सित जिमि
परमेश्वरयागु देगःया थां याना बी।
अले अनं व गुबलें हे पिहां वने
माली मखु। अले जिं उकी जिमि
परमेश्वरयागु नां च्वया बी, स्वर्ग
जिमि परमेश्वरयागु थासं क्वहां
वयाच्वंगु न्हूगु यरूशलेम धाःगु
शहरयागु नां व जिगु हे न्हूगु नां नं
उकी च्वयाबी।*

१३“सुयाके न्हाय्पं दु, वं आत्मां
मण्डलीतय्त छु धयादिल धयागु
न्यनाः थुइकाः का।

लाउडिकियाय् च्वंगु मण्डलीयात च्वःगु पौ

१४“लाउडिकियाय् च्वंगु मण्डली-
याम्ह दूतयात थथे धकाः च्वया
छ्व — परमेश्वरया दक्व सृष्टिया
मूल, आमैन धाःम्ह, विश्वास याये
बहःम्ह, खःगु खःगु जक साक्षी
बीम्हय्सिनं धयादी।*

१५“छिमिगु आनिबानि फुक्कं
जिं स्यू। छिपिं न क्वा हे क्वाः,
न ख्वाउँसे हे च्वं, बरु छिपिं कि
क्वाःसा ज्यू कि ख्वाउँसा ज्यू।
१६छिपिं क्वा नं मक्वाः अले ख्वाउँ

नं मजू, बरु लुमु लुमु धा:पिं जूगुलिं जिं छिमित थुकलं बी। १७ छिमिसं धा:सा 'जि त:मिम्ह खः, जिके माक्वं सम्पत्ति दु, उकिं जित: छुं नं मा:गु मदु' धका: धया जुयां छु याये? तर छिपिं तसकं हे दु:ख ताया च्वंपिं, माया वनापुसे च्वंपिं, चीमिपिं, कांपिं, अले पचिनांगापिं धका: छिमिके होश मदुनि। १८ उकिं छिमिसं त:मि जुइत मिइ दाया त:गु लुं, अले थ:गु पचिनांगागु म्हया मछा: तंकेत तुयुगु लं, व मिखां स्वये फय्केत जिके वास: न्या धका: जिं सल्लाह बियाचवना। १९ जिं माया यानापिन्त कज्युं नं याये, ब्व: नं बी, उकिं जिगु वचन बांलाक मानय् यायेमा: व पश्चाताप नं यायेमा:। *

२० "स्व, जिं लुखाय् दना: स:ता-चवना। सुनानं जिगु स: ताया: खापा चाय्का ब्यूसा जि दुहां वना: व नाप नयेत्वने याये। अले वं जि नाप नयेत्वने याइ। २१ गथे जिं त्याका: जि जिमि बा:यागु सिंहासनय् वय्क: नाप फयतुइ खंगु दु, अथे हे त्याम्हय्सित जिं जिगु सिंहासनय् जि नाप फयतुके बी।

२२ "सुयाके न्हाय्पं दु, वं आत्मां

मण्डलीतय्त छु धयादिल धयागु न्यना: थुइका: का।"

स्वर्ग्य परमेश्वरयात त:धंकूगु

१ थुलि जुइ धुंका: जिं थस्वया-बलय् स्वर्गया लुखा चालाच्वंगु खना। दकलय् न्हापालाक तुरही पुया ह:गु स: थें च्वंक जिं थथे धयाह:गु ताल — "थन थहां वा, अले छु छु जुइतिनि धका: जिं छन्त क्यने।" २ अले जि छक्कलं आत्मां जाल। जिं स्वर्ग्य छगू सिंहासन तयात:गु व उकी सुं छम्ह फयतुनाच्वंगु खना। ३ अन फयतुनाच्वंम्ह जास्पर व कार्नेलेन मणि थें खने दु। सिंहासनया जवंखवं पन्ना थेंज्या:गु कपं दु। * ४ अले हानं छचाखेरं नीप्यंगू सिंहासन तयात:गु दु। लुंयागु श्रीपेच पुया त:पिं व तुयुगु वसतं पुनात:पिं नीप्यम्ह थकालिपिं व सिंहासनय् फयतुनाच्वंगु दु। ५ सिंहासनं प्वालाक्क प्वालाक्क मि च्यानाच्वंगु, न न्या:थें स: वयाच्वंगु दु। सिंहासनया न्ह्य:ने न्हय्प्वा: मिप्वा: च्यानाच्वंगु दु। थ्व परमेश्वरया न्हय्म्ह आत्मा ख:। * ६ सिंहासनया न्ह्य:ने न्हाय्कंयागु समुद्र थें यचुसे खने दु।

सिंहासनया छचाखेरं ल्युने नं न्ह्य:ने

३:१६ हितो ३:१२; हिब १२:६ ४:२-३ इज १:२६-२८; १०:१

४:५ प्रस १६:१६; प्रका ८:५; ११:१६; १६:१८; इज १:१३; प्रका १:४; जक ४:२

नं मिखाया मिखा दुपिं प्यम्ह जीवात्मा
 दु। ७ न्हापांम्ह सिंह थें च्वं, निम्हम्ह
 द्वहं थें च्वं, अले स्वम्हम्हय्सिगु र्खाः
 मनूयागु र्खाः थें च्वं, प्यम्हम्ह ब्वया
 च्वंम्ह इमा थें च्वं।* ८ श्व प्यम्ह
 जीवात्मातय्के खुपा खुपा पपू दु,
 अले दुनेपिने फुककभनं मिखाया मिखा
 दु। थुमिसं चच्छि न्हिच्छिं मदिकक
 थथे म्ये हालाचवनी।

“पवित्र, पवित्र, पवित्रम्ह
 दक्वसिबय् तःधंम्ह
 व शक्ति दुम्ह
 परमप्रभु परमेश्वर।
 वय्कः न्हापांनिसें दीम्ह,
 आः नं दीम्ह,
 अले लिपा नं दीम्ह खः।”*

९ सिंहासनय् फ्यतुनादीम्ह न्हाबले
 म्वाना च्वनिम्हय्सिगु महिमा,
 हनाबना व सुभाय्या म्ये इपिं
 जीवात्मातय्सं हालाचवन। १० इपिं म्ये
 हालाच्वंबलय् सिंहासनय् दीम्हय्सिगु
 न्ह्यःने नीप्यम्ह थकालिपिनसं
 क्वछुनाः भागि यात। अले थः थःगु
 श्रीपेच वय्कःया सिंहासनया न्ह्यःने
 तयाः थथे धाल —

११ “जिमि प्रभु परमेश्वर,
 छिं हे फुककं खँ
 सृष्टि यानादीगु खः।
 छिगु इच्छाकथं हे
 फुककं दुगु खः,
 छिं हे सृष्टि यानादीगु खः।
 उकिं परमप्रभु जिमि परमेश्वर,
 छि महिमा, हनाबना
 व शक्ति दुम्ह खः।”

भ्याःचा व भ्वंथू

५ १ सिंहासनय् फ्यतुना च्वंम्हय्-
 सिगु जव ल्हातय् दुने नं पिने
 नं च्वया तःगु भ्वं छथू खना। उकी
 न्हय्थाय् छाप तया तःगु दु।* २ छम्ह
 तसकं बल्लाःम्ह स्वर्गदूतं ततसलं
 थथे धयाच्वंगु जिं तया — “श्व
 भ्वंथुइ तयातःगु छाप तछयानाः
 फ्यने फुम्ह सु दु?” ३ स्वर्गय्, पृथ्वीइ
 व पृथ्वी क्वय् नं श्व भ्वंथू फ्यने
 फुम्ह व थुकी दुने स्वये फुम्ह छम्ह
 हे मदु।

४ श्व भ्वंथू फ्यने फुम्ह वा स्वये
 फुम्ह सुं हे मदुगुलिं जि तसकं हे
 र्ववया। ५ अले छम्ह थकालिं जितः
 धाल — “रुवय् मते, यहूदा कुलयाम्ह
 सिंह, दाऊदया तःधंम्ह सन्तानं श्व

भ्वंथू फ्यनेत व थुकी च्वंगु न्हयगू
छाप प्वलेत त्याकाः वये धुंकल।”*

६अले जिं सिंहासन, प्यम्ह जीवात्मा
व थकालिपिनिगु दथुइ स्याना तये
धुंकूम्ह थें च्वंम्ह छम्ह भ्याःचा
दनाच्वंगु खना। थ्व भ्याःचायाके
न्हयपु नेकू व न्हयगः मिखा दु। थ्व
फुक्क पृथ्वीइ छ्वया हःपिं परमेश्वरया
न्हयम्ह आत्मा खः।* ७अले वं वनाः
सिंहासनय् फ्यतुना च्वंम्हय्सिगु जव
ल्हातय् च्वंगु भ्वंथू काल। ८थुकथं वं
थ्व भ्वंथू काये धुंकाः प्यम्ह जीवात्मा
व नीप्यम्ह थकालिपिं भ्याःचायागु
न्ह्यःने क्वछुत। इपिं फुक्कसिके
वीणा व गुंगू थना तःगु लुंयागु मकः
दु। थ्व विश्वासीतय्गु प्रार्थना खः।*
९इमिसं थथे धकाः छपु न्हूगु म्ये
हाल —

“थ्व भ्वंथुइ च्वंगु छाप
तछयानाः छिं हे जक
फ्यनादी फु,
छाय्धाःसा
छितः स्याये धुंकल,
अले छिगु हिं परमेश्वरया लागि
फुक्क कुलयापिं,
फुक्क भासं नवाइपिं,

फुक्क देशयापिं
व फुक्क जात जातियापिन्त
न्यानादिल।*

१०छिं हे इमित भी परमेश्वरया
सेवा यायेत छगू राज्य
व पुजाहारीत दय्कादिल।
अले इमिसं संसारय् राज्य याइ।”*

११जिं हानं स्वयाबलय् लखंलख
व करोडौं करोड स्वर्गदूततय्सं
सिंहासन, जीवात्मा व थकालिपिनिगु
चाकःछिं दनाः* १२थथे म्ये हाला
च्वंगु खना —

“स्याये धुंकूम्ह भ्याःचा हे
शक्ति, धन, बुद्धि, बल,
महिमा, हनाबना
व च्वछाये बहःम्ह खः।”

१३अले अन सृष्टि यानातःपिं स्वर्गय्
च्वंपिं, पृथ्वी व पृथ्वी तःले व समुद्रय्
च्वंपिं दक्वसिं थथे धयाच्वंगु जिं
ताया —

“सिंहासनय् फ्यतुना च्वंम्ह
व भ्याःचाया सदां
जय जय जुइमा।

अले न्ह्याबलें मान, इज्जत,
शक्ति व राज्य दयाचवनेमा।”

१४प्यम्ह जीवात्मां धाल—“आमेन!”
अले थकालिपिन्सं क्वछुनाः भागि
यात।

भ्याःचां न्हापांगु खुगू छाप प्वःगु

६ १भ्याःचां न्हयगू मध्ये छगू
छाप प्वःगु जिं खना। अले
प्यम्ह मध्ये छम्ह जीवात्मां न न्याः थें
तःसलं “वा” धाःगु जिं ताया। २अले
जिं छम्ह तुयुम्ह सल खना। थ्व सल
गया च्वंम्हय्सिके छगू धनु दु। वयात
श्रीपेच बिल। अले व त्याकुकुं अभ
त्याकेत वन।*

३भ्याःचां निगूगु छाप प्वःबलय्
निम्हम्ह जीवात्मां “वा” धकाः धाःगु
जिं ताया। ४अले हानं प्वाला प्वाला
थीक ह्याउंसे च्वंम्ह छम्ह सल पिहां
वल। थ्व सल गया वःम्हय्सिनं
पृथ्वीइ शान्ति मदयेका बिल। अले
मनूतय्सं मनूतय्त स्याकेत वयात
छपु ताहाकःगु तरवार नं बिल।*

५भ्याःचां हानं मेगु स्वंगूगु छाप
प्वःबलय् हानं स्वम्हम्ह जीवात्मां
थथे धाल — “वा।” अले हानं छम्ह
हाकूम्ह सलयात खना। थ्व सल गया

च्वंम्हय्सिगु ल्हातय् छज्वः ताल्जु
दु।* ६प्यम्ह जीवात्मातय्गु दथुं
थुकथं धयाच्वंगु सः जिं ताया —
“न्हिच्छि ज्या याइम्हय्सित छगू
किलो छ्वचुं ज्याला बी माः। अले
तछ्व काइम्हय्सित जूसा स्वंगू किलो
ज्याला बी माः। चिकं व दाखमद्ययात
धाःसा स्यंके मते।”

७हानं प्यंगूगु छाप प्वःबलय्
प्यम्हम्ह जीवात्मां थथे धाःगु जिं
ताया — “वा।” ८अले जिं म्हासुसे
च्वंम्ह छम्ह सलयात खना। थ्व सल
गया च्वंम्हय्सिगु नां मृत्यु खः। उकिं
नरक धाःम्ह वयागु ल्यू ल्यू वःगु
खः। इमित पृथ्वीयागु प्यब्वय् छब्व
तरवारं पालेगु, नयेमखंकाः स्यायेगु,
ल्वचं स्यायेगु, अले जंगलय् च्वंपिं
पशुतय्सं स्याकेगु अधिकार बिल।*

९न्यागूगु छाप प्वःबलय् जिं परमेश्वर-
यात मत्वःतुसे वय्कःयागु वचन
न्यंकूगुलिं स्याःपिनिगु आत्मातय्त
होम यायेगु थाय्यागु तःले खना।
१०थुपिं तसकं हाला हल — “शक्ति
दुम्ह, पवित्रम्ह व सत्यम्ह परमप्रभु,
पृथ्वीइ च्वंपिन्त छिं गुबलय् जिमित
स्याःगु पलेसा कायेत न्याय याना-
दीगु?” ११अले इपिं फुक्कसितं
छपाः छपाः तुयुगु लं बिल। इपिं थें

तुं स्याके मानिपिं परमेश्वरया दासत व इमि दाजुकिजापिन्त नं मस्यातले पिया च्वं धकाः इमित धाल।

१२ हानं खुगूगु छाप प्वःगु जिं खना। अबलय् तसकं हे भ्वखाय् ब्वल। हाकुगु भांग्रा थें सूर्य हाकुसे च्वना वन। तिमिला छपातं हि थें ह्याउँसे च्वना वन।* १३ ग्वःफसं पाकय् मजूनिगु यःमरि कुतुं वंकु थें आकाशय् च्वंगु नगु नं पृथ्वीइ कुतुं वल। १४ भ्वंथू तुला वं थें आकाश नं थू तुला वन। पहाडत व टापुत फुक्कं चिला वन।*

१५ अले पृथ्वीइ च्वंपिं जुजुपिं, ततःधंपिं मनूत, सेनापतित, तःमिपिं, बल्लाःपिं, दास व दासमुखिपिं, फुक्कं गुफा व तःग्वःगु ल्वहंया कापिइ सू वन।* १६ इमिसं पहाड व तःग्वःगु ल्वहंयात थथे धाल — “सिंहासनय् फ्यतुना च्वंमह्यसिगु मिखां सुचुकाः व भ्याःचायागु तं फये म्वायेक जिमित ल्हाका छ्वया ब्यु।* १७ छाय्धाःसा वय्कलं न्याय व सजाँय याइगु दिन वये धुंकल, उकिं सु जक बचय् जुयाः च्वने फइ?”*

छगू लाख व पीप्यद्वः मनूत

७ १ अनं लिपा सिमा, समुद्र व पृथ्वीइ फय् वने मजीक प्यमह स्वर्गदूतत पृथ्वीयागु प्यंगू कुन्चाय् च्वनाः फय् प्वाः तिनाच्वंगु जिं खना।* २ म्वाःमह परमेश्वरयागु छाप ज्वनाः सूर्य लुइगु थासं थहां वयाच्वंमह छमह स्वर्गदूतयात जिं खना। अले वं समुद्र व पृथ्वीयात स्यंकेगु अधिकार बिया तःपिं प्यमह स्वर्गदूततयत् तसकं हालाः थथे धाल। ३ “भी परमेश्वरया दासतय्गु कपालय् छाप मततले सिमा, समुद्र, व पृथ्वीयात स्यंके मते।”* ४ इस्राएलया फुक्क कुलं छगू लाख व पीप्यद्वः मनूतयत् छाप तःगु जिं ताया।

५ यहूदाया कुलं १२,००० म्ह,
रूबेनया कुलं १२,००० म्ह,
गादया कुलं १२,००० म्ह,
६ आशेरया कुलं १२,००० म्ह,
नप्तालीया कुलं १२,००० म्ह,
मनश्शेया कुलं १२,००० म्ह,
७ शिमियोनया कुलं १२,००० म्ह,

६:१२ प्रका ११:१३; १६:१८; यशै १३:१०; योए २:१०,३१; ३:१५; मत्ती २४:२६;

मर्क १३:२४-२५; लूक २१:२५ ६:१३-१४ यशै ३४:४; प्रका १६:२०

६:१५ यशै २:१६,२१ ६:१६ होशै १०:८; लूक २३:३० ६:१७ योए २:११; मला ३:२

७:१ यर ४६:३६; दान ७:२; जक ६:५ ७:३ इज ६:४-६

लेवीया कुलं १२,००० म्ह,
 इस्साखारया कुलं ... १२,००० म्ह,
 ६जबूलूनया कुलं १२,००० म्ह,
 योसेफया कुलं १२,००० म्ह,
 बेन्यामीनया कुलं .. १२,००० म्ह।

फुक्क जात जातियापिं मनूत

६थुलि जुइ धुंका: जिं स्वयाबलय्
 जात जातियापिं मनूत, कुल कुलयापिं
 मनूत व फुक्क देश देशयापिं मनूत,
 थी थी भासं नवाइपिं मनूत तुयुगु
 वसतं पुना: ल्हातिइ ताय्ग: सिमायागु
 कचा ज्वना: सिंहासन व भ्या:चाया
 न्ह्य:ने दनाच्वंगु जिं खना। १०इपिं
 थुकथं ततसलं हाल —

“सिंहासनय् फ्यतुनादीम्ह
 भी परमेश्वरयाके
 व भ्या:चायाके हे जक
 मनूतय्त उद्धार यायेगु
 अधिकार दु।”

११फुक्क स्वर्गदूतत सिंहासन,
 थकालिपिं व प्यम्ह जीवात्मातय्गु
 चाक:छिं दनाच्वन। थुपिं फुक्कसिनं
 सिंहासनयागु न्ह्य:ने भागि याना: थथे
 धका: परमेश्वरयात त:धंकल।

१२“आमेन! परमेश्वरयागु
 प्रशंसा, महिमा, ज्ञान,
 सुभाय्, मान, शक्ति व बल
 न्ह्याबलें दयाच्वनेमा। आमेन!”

१३अले छम्ह थकालिं जित: थथे
 धाल — “थ्व तुयुगु वसतं फिना त:पिं
 सु ख:, अले इपिं गनं व:पिं ख: धका:
 छं स्यू ला?”

१४“प्रभु, छिं जक स्यू” धका: जिं
 वयात लिस: बिया। अले वय्कलं
 धयादिल — “तसकं त:धंगु दु:ख-
 कष्ट सह याना व:पिं मनूत इपिं हे
 ख:। इमिसं भ्या:चायागु हिं थ:थ:गु
 वस: हिया: थथे तुयुसे च्वंका त:गु
 ख:।* ”

१५उकिं हे ला ख:नि,
 आ: परमेश्वरया
 सिंहासनया न्ह्य:ने च्वना:
 चच्छिं न्हिच्छिं
 देगलय् हे च्वना: वय्क:या
 सेवा यानाच्वनी।
 सिंहासनय् दीम्हय्सिनं हे
 इमिगु दथुइ च्वना:
 रक्षा यानादी।
 १६अन इमित गुबलें हे

नयेपित्याइ मखु,
प्या:चाइ नं मखु।

निभालं व गुगुं क्वा: जलं
इमित पुइ मखु।*

१७सिंहासनयागु दथुइ च्वंम्ह
भ्या:चा हे

इमित जइम्ह जुइ।

अले इमित वय्कलं हे गुबलें

मसुइगु बुंगा:चाय्
ब्वना यंकादी।


अले परमेश्वरं हे

इमिगु मिखाय् च्वंगु
ख्वबि हुयादी।”*

न्हय्गूगु छाप व लुँयागु गुंगू
थनिगु वेदी

८ १भ्या:चां न्हय्गूगु छाप प्व:-
बलय् बाघौ तक स्वर्गय्
सुनसान जुल। २अले परमेश्वरया न्ह्या:ने
दना च्वंपिं न्हय्म्ह स्वर्गदूततय्त जिं
खना। इमित न्हय्पु तुरही बिल।

३मेम्ह छम्ह स्वर्गदूत ल्हातिइ
लुँयागु गुंगू थनिगु मक: ज्वना:
वेदीया लिक्क दं वल। विश्वासीतय्गु
प्रार्थना लिसें सिंहासनया न्ह्या:ने च्वंगु
लुँयागु वेदीइ च्याकेत धका: वयात



तुरही व नेकू

यक्व गुंगू बिल।* ४विश्वासीतय्सं
या:गु प्रार्थना नाप नापं स्वर्गदूतयागु
ल्हातिइ च्यानाच्वंगु गुंगूया कुँत्या:
च्वय् थहां वनाच्वन। ५अले स्वर्गदूतं
गुंगू मक: कया: उकी वेदीइ च्वंगु मि
जाय्क तया: पृथ्वीइ वांछ्वया हल।
अले ग्राङ्गुङ्ग स: वल प्वालाक्क
पिलाक हावलासा त्वल। अले हानं
भव्खाय् ब्वल।*

न्हय्पु तुरही पुया ह:गु

६थुलि जुइ धुंका: न्हय्पु तुरही
ज्वना च्वंपिं न्हय्म्ह स्वर्गदूततय्सं
तुरही पुइत्यन।

७न्हापांम्ह स्वर्गदूतं तुरही पूबलय्
हि ल्वाकज्या:गु प्वं व मि पृथ्वीइ
वांछ्वया हल। अले स्वब्बय् छब्ब
पृथ्वी च्यात, स्वब्बय् छब्ब सिमा

७:१६ यशै ४६:१० ७:१७ भज २३:१-२; इज ३४:२३; यशै ४६:१०; २५:८

८:३ आमो ६:१; प्रस ३०:१,३

८:५ लेवी १६:१२; इज १०:२; प्रस १६:१६; प्रका ११:१६; १६:१८

नं च्यात, अले वाउंगु घाँय् नं फुकक
च्याना वन।*

९निम्हम्ह स्वर्गदूतं थःगु तुरही पुल।
अले दनदन मि च्यानाच्वंगु पहाड
थेंज्याःगु छुं छगू समुद्रय् वांछ्वया
हल। स्वब्बय् छब्ब समुद्र हि जुल।
९अले समुद्रय् च्वंपिं स्वब्बय् छब्ब
जीवजन्तुत नं सित। स्वब्बय् छब्ब
लःजहाज नं स्यन।

१०हानं स्वम्हम्ह स्वर्गदूतं थःगु तुरही
पुल। अले ला मिप्वाः थें च्यानाः
तःग्वःगु नगु छगः आकाशं कुतुं वयाः
स्वब्बय् छब्ब खुसि व बुंगाःचाय्
लात।* ११श्व नगुयागु नां “खायु”
खः। अले थुकिं यानाः स्वब्बय् छब्ब
लः खाइसे च्वना वन। थथे लः खाइसे
च्वना वंगुलिं व लखं यानाः यक्व हे
मनूत सित।*

१२अले प्यम्हम्ह स्वर्गदूतं थःगु
तुरही पुल। स्वब्बय् छब्ब सूर्य व
स्वब्बय् छब्ब तिमिला व स्वब्बय्
छब्ब नगुयात स्यंका ब्यूगुलिं स्वब्बय्
छब्ब न्हि खिउंसे च्वना वन, स्वब्बय्
छब्ब चा नं अथे हे जुल।*

१३थुलि जुइ धुंकाः जिं आकाशय्
ततसलं थथे हालाः ब्वया च्वंम्ह छम्ह

इमायात खना। “आवंनिसें पृथ्वीइ
च्वंपिन्त तसकं धिक्कार, धिक्कार,
धिक्कार, छाय्धाःसा अभनं स्वम्ह
स्वर्गदूततय्सं थःथःगु तुरही पुया-
हइतिनि।”

९ १अले न्याम्हम्ह स्वर्गदूतं थःगु
तुरही पुल। अबलय् छगः नगु
स्वर्ग पृथ्वीइ कुतुं वःगु जिं खना।
वयात तसकं तःजाःगु गाःयागु ताःचा
बिल। २अले वं व तसकं हे तःजाःगु
गाः चाय्कूबलय् तसकं च्यानाच्वंगु
भट्टिं कुंत्याः वःथें वःगुलिं सूर्य व
आकाश छुं हे खने मदय्क खिउंगुलिं
त्वपुल।*

३श्व कुं पृथ्वीइ क्वःबुइंचात पिहां
वल। इमित पृथ्वीइ च्वंपिं बिच्छि-
तय्गु थेंज्याःगु शक्ति बिल।* ४पृथ्वीइ
च्वंगु घाँय्, सिमा व वाउंगु छुं नं
स्यंके मते धकाः इमित धाल। तर
कपालय् परमेश्वरयागु छाप मदुपिं
मनूतय्त जक कष्ट ब्यु धकाः इमित
धाल।* ५इमित स्यायेत हे ला मखु,
न्याला तक सह याये हे मफय्क
सास्ति बीत अधिकार बिया तःगु दु।
इमित सास्ति जुइबलय् बिच्छिं न्याः
थें जुइ। ६थुबलय् मनूत सीत सनी,

८:७ प्रस ९:२३-२५; इज ३८:२२ ८:१० यशै १४:१२ ८:११ यर ९:१५

८:१२ यशै १३:१०; इज ३२:७; योए २:१०,३१; ३:१५ ९:२ उत १९:२८

९:३ प्रस १०:१२-१५ ९:४ इज ९:४

अयनं सी फइ मखु। इमिसं सीत कुतः
याःसां काल इपिं खनाः बिस्सुं वनी।*

७ श्व क्वःबुइँचात लडाइँलय् वने
त्यपिं सल थें च्वं। इमिगु छेनय्
लुँयागु श्रीपेच थें च्वंगु खने दु। इमिगु
रूवाःपाः मनूतय्गु रूवाःपाः थें च्वं।*

८ इमिगु सँ नं मिसातय्गु सँ थें ताहा।
इमिगु वा नं सिंहयागु वा थें च्वं।*

९ इमिगु छातिइ नयागु पातां चिनातःगु
थें च्वं। इमिगु पपू संकूबलय् वःगु
सः ला लडाइँलय् यक्व सलं सालिगु
रथयागु सः थें च्वं।*

१० इमिगु न्हिप्यं
व कं बिच्छियागु थें च्वं। इमिगु
न्हिप्यनय् मनूतय्त् न्याला तक सास्ति
बियातय्गु शक्ति दु। ११ तसकं तःजाःगु
गाःयाम्ह दूत इमि जुजु थें खः। वयागु
नां हिब्रू भासं एबाड्डोन, अले ग्रीक
भासं अपोल्लियोन खः।

१२ थुकथं न्हापांगु विपत्ति फुत,
अयनं निगू विपत्ति ला ल्यं हे दनि।

१३ अले खुम्हम्ह स्वर्गदूतं थःगु तुरही
पुल। परमेश्वरयागु न्ह्यःने च्वंगु लुँयागु
गुंगू थनेगु वेदीया प्यंगू नेकुतिं थुकथं
तुरही पूम्ह खुम्हम्ह स्वर्गदूतयात धया
हःगु सः जिं ताल — * १४ “यूफ्रेटिस
खुसिइ चिना तःपिं प्यम्ह दूततय्त्
फ्यना ब्यु।” १५ अले वं प्यम्ह दूततय्त्

फ्यना बिल। स्वब्बय् छब्ब मनूतय्त्
स्यायेत थ्व हे घौ, न्हि, महिना व दँया
लागि तयार याना तःपिं थुपिं हे खः।

१६ इमिगु सल गया वनिपिनिगु फौज
२००,०००,००० (नीगू करोड) दु
धाःगु जिं न्यना।

१७ जिं दर्शनय् सल व सल गया च्वंपिं
खना। सल गया च्वंपिनिगु छातिइ

नयागु पातां चिना तःगु दु। थुकियागु
रंग मि थें ह्याउँसे, निलम थें वँचुसे
व गन्धक थें म्हासुसे च्वं। सलतय्गु
छचं सिंहतय्गु थें च्वं। इमिगु म्हुतुं

मि, कुँ, व गन्धक पिहां वयाच्वंगु दु।
१८ इमिगु म्हुतुं पिहां वयाच्वंगु नाश
याइगु मि, कुँ व गन्धकया विपत्तिं
स्वब्बय् छब्ब मनूतय्त् स्याना बिल।

१९ छायाधाःसा सलतय्गु शक्ति इमिगु
म्हुतुइ व न्हिप्यनय् जुयाच्वन। इमिगु
न्हिप्यं सर्पयागु छचं थें च्वं। थुकिं हे
इमिसं मनूतय्त् न्यानाः स्याइ।

२० थुकिं मस्याःपिं मनूतय्सं अभ्र नं
थःगु ल्हातिं याःगु ज्यायागु पश्चाताप
मयाः। इमिसं भूतयात पुजा यायेगु
व लुँ, वहः, सिजः, ल्वहं व सिँयागु
मूर्तियात पुजा यायेगु मत्वःतू। श्व
द्यःतय्सं मखं, मताः, अले न्यासि जुइ
मफु।* २१ अले इमिसं मनू स्यायेगु,

जादुक्यनिगु, व्यभिचार यायेगु व खुइगु ज्याया पश्चाताप मयाः।

स्वर्गदूत व चिथुगु भवं

१० १अले हानं सुपांचं हिना तःम्ह, छेनय् कपं दुम्ह, सूर्ययागु थें ख्वाः दुम्ह, मियागु थां थें च्वंगु तुति दुम्ह तसकं बल्लाःम्ह छम्ह स्वर्गदूत स्वर्गं क्वहां वयाच्वंगु जिं खना। २वयागु ल्हातिइ चिथुगु भवं छथू फ्यना तःगु दु। वं थःगु जव तुतिं समुद्रय् व खव तुतिं बँय् चुल। ३अले सिंह हाःथें ततसलं व हाल। थथे व हाःगुलिं न्हय्कः न न्याये थें ग्राङ्गुइ मिंक सः वल।

४थथे न्हय्कः न न्याये थें सः वये धुंकाः जिं च्वय् त्यनाबलय् स्वर्गं थथे धया हःगु सः ताल — “न्हय्कः न न्याः थें वःगु सःयागु खँ सुयातं कने मते, अले च्वये नं मते।”

५बँय् व समुद्रय् तुतिं चुयाः दना च्वंम्ह स्वर्गदूतं थःगु ल्हाः स्वर्गय् ल्हनाः ६स्वर्गं व स्वर्गय् च्वंगु फुककं, पृथ्वी व पृथ्वीइ च्वंगु फुककं, समुद्र व समुद्रय् च्वंगु फुककं सृष्टि याना-दीम्ह न्हाबलें म्वाना च्वनिम्हय्सिगु नामय् पा फल। वं धाल — “आः लिबाइ मखुत।” ७न्हय्म्हम्ह स्वर्गदूतं

थःगु तुरही पुइबलय् परमेश्वरं न्हापां-निसें वय्कःया दास अगमवक्तातय्त कनातःगु वय्कःयागु गुप्ति खँ नं पूर्वकादी।*

८स्वर्गं हानं थथे धया हःगु जिं ताल — “हुँ, समुद्रय् व बँय् पलाः तयाः दना च्वंम्ह स्वर्गदूतयागु ल्हातिइ दुगु फ्यना तःगु चिथुगु भवं का।”

९अले जिं वनाः “व चिथुगु भवं जितः बियादिसँ” धकाः व स्वर्गदूत-यात धया। अले वं जितः थथे धाल — “का, थ्व न। थ्व नयेबलय् प्वाथय् तसकं खाइसे च्वनी, म्हुतुइ धाःसा कस्ति थें चाकुसे च्वनी।”

१०अले स्वर्गदूतयागु ल्हातिइ च्वंगु चिथुगु भवं कयाः जिं नया बिया। नयाबलय् म्हुतुइ कस्ति थें चाकुसे च्वन, अले प्वाथय् थ्यंबलय् तसकं हे खाइसे च्वना वल।*

११अले वं जितः धाल — “हानं छकः यक्व देश देशयापिं मनूतय्त, जात जातियापिं मनूतय्त, थी थी भासं नवाइपिं मनूतय्त व जुजु जुजुपिन्त नं छं अगमवाणी कने मानि।”

निम्ह साक्षी

११ १अले जितः नापय् यायेगु थेंज्याःगु तिंकथि छपु बियाः

थथे धाल — “दँ, परमेश्वरयागु देगः, व वेदी नापय् या। अले अन वयाः आराधना याइपिं ल्याः खा।* २देगः पिने च्वंगु चुकय् धाःसा नापय् याये मते, छायाःसा व ला यहूदीमखुपिन्त बी धुन। इमिसं थ्व पवित्रगु शहरयात पीनिला तक न्हुत्तुन्हुया तइ।* ३अले जिं जिमि निम्ह साक्षी बीपिन्त भांग्रायागु वसतं पुंकाः द्वःछि व निसः व खुइन्हु तक अगमवाणी कनेगु शक्ति बी।”

४इपिं जैतूनयागु निमा सिमा व पृथ्वीयाम्ह प्रभुयागु न्ह्यःने थनातःगु निपु त्वाःदेवा खः।* ५सुनानं इमित सास्ति यायेत वल धाःसा इमिगु म्हुतुं मि पिहां वयाः इमि शत्रुतय्त नाश यानाबी। सुं मनू इमित स्यंकेत वल धाःसा वयात नं अथे हे यानाः स्यानाबी। ६इमिके अगमवाणी कना- च्वंगु इलय् वा मवय्मा धकाः आकाश हे तिना बीगु शक्ति दु, हानं लःयात हि याना बीगु शक्ति नं दु। इमित यःबलय् पृथ्वीइ न्ह्याथें ज्याःगु ल्वय् हयेगु अधिकार नं इमिके दु।*

७इमिसं बी माःगु साक्षी बी धुंकाः

तसकं तःजाःगु गालं थहां वःम्ह पशुं इपिं नापं ल्वानाः इमित स्याना बी।* ८इमि प्रभुयात कूसय् यख्खाःगु तःधंगु शहरय् च्वंगु लँय्सं इमिगु सीम्ह अथें लानाचवनी। मेकथं धायेगु खःसा थ्व शहर सदोम व मिश्र देश थें च्वंगु खः।* ९देश देशयापिं मनूतय्सं, कुल कुलयापिं मनूतय्सं, थी थी भासं नवाइपिं मनूतय्सं व जात जातियापिं मनूतय्सं इमिगु सीम्ह स्वन्हु व बान्हु तक स्वयाचवनी। इमिसं सीम्ह थुंके बी मखु। १०अबलय् पृथ्वीइ च्वंपिं मनूत फुककं इपिं सीगुलिं लय्लय् ताइ। थ्व निम्ह अगमवक्तातय्सं यानाः पृथ्वीइ च्वंपिन्त तसकं सास्ति जुया च्वंगुलिं इपिं लय्लय् तातां थःथवय् उपहार बीगु याइ।

११स्वन्हु व बान्हु दये धुंकाः परमेश्वरं छ्वया हयादीगु हंस इमिके दुहां वन। अले इपिं तुतिं चुयाः जुरुक्क दन। इमित खंपिं फुककं तसकं ग्यात।* १२अले इमिसं स्वर्गं थथे धया हःगु सः ताल — “थन थहां वा।” इमि शत्रुतय्सं खंक खंक हे इपिं सुपाँचय् च्वनाः स्वर्गय् थहां वन।*

११:१ इज ४०:३; जक २:१-२ ११:२ लूक २१:२४ ११:४ जक ४:३,११-१४

११:६ १ राज १७:१; प्रस ७:१७-१९; १ शमू ४:८

११:७ दान ७:७,२१; प्रका १३:५-७; १७:८ ११:८ यशै १:९-१० ११:११ इज ३७:१०

११:१२ २ राज २:११

१३ अबलय् हे तसकं भवखाय्
 ब्वल। भिब्वय् छब्व शहर दुना
 वन। भवखाय् ब्वःबलय् न्हय्द्वः
 मनूत सित। ल्यंदिनिपिं मनूत फुक्क
 ग्यानाः स्वर्गय् च्वंम्ह परमेश्वरयात
 तःधंकल।*

१४ निगूगु विपत्ति फुत। स्वंगूगु
 विपत्ति याकनं हे वयेत्यंगु दु।

न्हय्गूगु तुरही

१५ अले न्हय्म्हम्ह स्वर्गदूतं थःगु
 तुरही पुल। अले स्वर्गं तस्सलं थथे
 धया हल —

“संसारयागु राज्य भी प्रभु
 व वय्कःया स्त्रीष्टयागु
 राज्य जुल।
 वय्कलं सदांया निंतिं
 राज्य यानादी।”*

१६ परमेश्वरयागु न्ह्यःने थः थःगु
 सिंहासनय् फ्यतुना च्वंपिं नीप्यम्ह
 थकालिपिन्सं क्वछुनाः परमेश्वरयात
 थथे धकाः तःधंकल —

१७ “न्हापा दीम्ह,
 आः नं दीम्ह,

दक्वसिबय् तःधंम्ह
 व शक्ति दुम्ह

परमप्रभु परमेश्वर
 जिमिसं छितः सुभाय्
 देछाया च्वना।

छिं हे छिगु तःधंगु शक्ति
 ज्वनाः राज्य यानादिल।

१८ जात जातियापिं मनूत
 छि खनाः

तसकं तं म्वय्कल।

आः छिगु तं पिकाय्गु ई वल,
 अले सीपिन्त न्याय यायेगु।

छिकपिनि दास

अगमवक्तातय्त

व विश्वासीतय्त,

छितः मानय् यानाच्वंपिं

तःधंपिं व चिधंपिं

फुक्कसितं सिरपाः बीगु

व पृथ्वीयात स्यंकूपिन्त

न्हंकेगु ई नं वये धुंकल।”*

१९ अले स्वर्गय् च्वंगु परमेश्वरया
 पवित्र देगः चाल। अन बाचा चिना
 तःगु सनू खने दत। अले भिलिक्क
 भिलिक्क हावलासा च्यात, ततसलं
 ग्यानापुक ग्राङ्गुङ्ग सः वल। भवखाय्
 ब्वल, तसकं प्वं गात।*

मिसा व अजिङ्गर

१२ १ अनंलि स्वर्गय् तसकं
तःधंगु छगू चिं खने दत।
अन सूर्ययागु वसः पुना तःम्ह,
तिमिलाया च्वय् तुति तथा तःम्ह,
भिनिगः नगुयागु श्रीपेच पुया तःम्ह
छम्ह मिसायात जिं खना। २ व मिसा
प्वाथय् दुम्ह जूगुलिं मचा बुइगु ब्यथा
सह याये मफयाः तसकं हाला च्वंगु
खः।

३ हानं मेगु छगू चिं स्वर्गय् खने दत।
छम्ह तसकं ग्यानापुसे च्वंम्ह, ह्याउँसे
च्वंम्ह, न्हय्गः छयं, भिपु नेकू व
न्हय्गः छेनय् श्रीपेच दुम्ह अजिङ्गरयात
खना। * ४ वयागु न्हिप्यनं आकाशय्
स्वब्वय् छब्व नगुयात बँ पुइ थें
पुयाः पृथ्वीइ कुर्का हल। व अजिङ्गर
बुइत्यंम्ह मचायात नयेत प्वाथय् दुम्ह
मिसाया न्ह्यःने पिवाः च्वनाच्वन। *

५ अले व मिसां जात जातियापिन्त
नँयागु दण्डीं राज्य याइम्ह छम्ह मिजं
मचायात बुइकल। व मिसां बुइकूम्ह
मचा परमेश्वर च्वनादीथाय् वय्कःयागु
सिंहासन दुथाय् बिसिके यंकल। *
६ अले व मिसा मरूभूमिइ परमेश्वरं

दय्का तथादीगु थासय् बिस्युं वन।
अन हे व मिसायात द्वःछि व निसः
व खुइन्हु तक लहिना तथादिल।

७ अनं लिपा स्वर्गय् लडाइँ जुल।
मिखाएल धाःम्ह स्वर्गदूत व वया
दूतत, अजिङ्गर व वया दूतत नाप
ल्वात। * ८ अजिङ्गर व वया दूतत
बूगुलिं इमित स्वर्गय् च्वनेगु थाये
मन्त। ९ अले व तसकं ग्यानापुसे
च्वंम्ह अजिङ्गरयात क्वय् क्वफाना
हल। फुकक संसारय् च्वंपिन्त थगय्
याइम्ह पुलांम्ह सर्प व हे खः। वयात
दुष्ट व शैतान धकाः नं धाः। वयात व
वया दूततय् पृथ्वीइ वांछ्वया हल। *

१० अले स्वर्ग पाखें थथे धया हःगु
छगू तस्सःगु सः जिं ताया —

“आः परमेश्वरं भीत

उद्धार यानादी।

परमेश्वरं अधिकार क्यनाः

खीष्टयात राज्य याकादिल।

चा न्हिं भी परमेश्वरया न्ह्यःने

भी दाजुकिजापिनिगु

विरोध यानाः

दोष बीत स्वइम्हय्सित

क्वफाना हये धुंकल। *

१२:३ दान ७:७ १२:४ दान ८:१० १२:५ यशै ६६:७; भज २:६

१२:७ दान १०:१३, २१; १२:१; यहू ६ १२:६ उत ३:१; लूक १०:१८

१२:१० अयू १:६-११; जक ३:१

११भ्याःचायागु हिं व इमिसं
 न्यंकूगु वचनं यानाः
 इमिसं वयात बुका बिल।
 इपिं सीत तकं लिमच्यू।
 १२उकिं स्वर्ग व स्वर्गय् च्वंपिं
 फुक्कं लय्ताः।
 अय्नं पृथ्वी व समुद्रयात
 धिक्कार, छायाःसा
 तसकं तं पिकयाः
 शैतान छिमिथाय् वःगु दु।
 वयागु ई अप्वः मन्त धकाः
 स्यूगुलिं वं थथे याःगु खः।”

१३थथे पृथ्वीइ वांछ्वया हःगुलिं
 अजिङ्गरं मचा बुइकूम्ह मिसायात
 लिना जुल। १४उकिं मरुभूमिइ बिस्युं
 वनेत व मिसायात तसकं तःधिकम्ह
 इमायागु निपा पपू छुना बिल। अन
 हे व मिसायात स्वदं व खुला लहिना
 तल।*

१५व मिसायात चुइके छ्वयेत
 व अजिङ्गरं थःगु म्हुतुं खुसि थें लः
 पिकाल। १६पृथ्वीं व मिसायात बचय्
 यायेत थःगु म्हुतु चाय्काः अजिङ्गरं
 पिकाःगु लः फुक्क त्वनाछ्वत।
 १७अले व मिसा खनाः भन
 तसकं तंम्बल। उकिं वया सन्तान,
 परमेश्वरयागु आज्ञा मानय् याना च्वंपिं

व येजूयागु वचन सत्य खः धकाः
 धाइपिं नाप ल्वायेत अजिङ्गर वन।

१८अले व समुद्रयागु सिथय् दना-
 च्वन।

समुद्रं पिहां वःम्ह पशु

१३ १अले जिं भिपु नेकू व
 न्हय्गः छचं दुम्ह पशु समुद्रं
 पिहां वयाच्वंगु खना। वयागु नेकू
 पतिकं श्रीपेच दु। वयागु छचं पतिकं
 परमेश्वरयात सराः बीगु नां च्वयातःगु
 दु।* २व पशु चितुवा थें च्वं। वयागु
 तुति भालुयागु, म्हुतु सिंहयागु थें च्वं।
 अले वयात हे अजिङ्गरं थःगु शक्ति,
 थःगु सिंहासन व तःधंगु अधिकार
 बिल।*

३वयागु छगः छेनय् सीथें च्वंक घाः
 यानातःगु दु। अय्नं थ्व घाः लना वन।
 उकिं अजूचायाः संसारय् च्वंपिं फुक्क
 मनूत व पशुया ल्यू ल्यू वन। ४सकलें
 मनूतय्सं अजिङ्गरयात पुजा याइगु
 खः। अले व अजिङ्गरं थःगु अधिकार
 पशुयात बिल। अथे जुयाः मनूतय्सं
 थथे धयाः पशुयात नं पुजा यात —
 “थ्व पशु थें ज्याःम्ह सु दु? थ्व पशु
 नाप सु ल्वाये फइ?”

५अले पशुयात घमण्डी खँ ल्हाइगु
 व परमेश्वरयात हेस्यानाः खँ ल्हाइगु

छप्वाः म्हुतु बिल। पीनिला तक
व पशुयात अधिकार याकेबिल।
६अले परमेश्वरयात क्वह्यंकेत,
वय्कःया नां व च्वनेगु थाय् अले
स्वर्ग्य् च्वंपिं फुक्कसितं हेस्यानाः
खँ ल्हायेत वं थःगु म्हुतुप्वाः
चाय्कल।* ७वयात विश्वासीत नाप
ल्वायेगु व इमित बुकेगु अधिकार
बिल। फुक्क कुलयापिं मनूतय्त,
देश देशयापिं मनूतय्त, थी थी भासं
नवाइपिं मनूतय्त व जात जातियापिं
मनूतय्त नं व पशुयात अधिकार
याके बिल।* ८अले पृथ्वीइ च्वंपिं
फुक्कसिनं व पशुयात पुजा याइ।
संसारयागु सृष्टि जूसानिसें स्याःम्ह
भ्याःचाया जीवनयागु सफुलिइ नां
च्वया मतःपिं फुक्कसिनं वयात
पुज्याइ।*

९सुया न्हाय्पं दु वं न्यना का।

१०ज्वना यंके माःपिन्त

ज्वना हे यंकी।


तरवारं सीमाःपिं तरवारं हे सी।

थुबलय् हे खः सकल विश्वासीतय्सं
विश्वास मत्वःतुसे सह यानाच्च्वने
माःगु।*

पृथ्वीं पिहां वःम्ह पशु

११जिं हानं पृथ्वीं पिहां वयाच्च्वम्ह
छम्ह मेम्ह पशुयात खना। भ्याःचायागु थें
वयाके निपु नेकू दु। वं नवाःगु अजिङ्गरं
नवाःगु थें च्वं। १२न्हापांयाम्ह पशुयागु
न्हाःने हे वयागु फुक्क अधिकार
थ्व पशुं कयाः चलय् यात। सीथें
च्वंक घाः जुयाः नं लाःम्ह न्हापांयाम्ह
पशुयात पृथ्वी व पृथ्वीइ च्वंपिं
फुक्कसिनं पुजा याकेत थ्व पशुं कर
यात। १३थ्व मनूतय्सं खंक खंक हे
आकाशं पृथ्वीइ मि गाय्केगु थेंज्याःगु
तसकं हे अजूचायापुगु चिं याना क्यन।
१४न्हापांयाम्ह पशुयागु न्हाःने हे वयात
अथे चिं क्यनेगु अधिकार ब्युगुलिं
पृथ्वीइ च्वंपिन्त थ्वं ध्वं लायेगु
याना जुल। तरवारं पालाः घाः जुलं
हे म्वाना च्वंम्ह न्हापांयाम्ह पशुयागु
मूर्ति दय्कि धकाः फुक्कसितं उजं
बिल। १५न्हापांयाम्ह पशुयागु मूर्तियात
नवाकेत सास तथा बीगु व वयात
पुजा मयाःपिन्त स्यायेगु अधिकार व
पशुयात बियातःगु दु।

१६अले वं तःधंपिन्त, चिधंपिन्त,
तःमिपिन्त, चीमिपिन्त, दासतय्त,
दास मखुपिन्त फुक्कसितं नं कपालय्



वीणा

वा जव ल्हातय् चिं तयेकल। १७ थ्व चिं मदुपिं सुनानं न्याये नं दइ मखु, अले मी नं दइ मखु। थ्व चिं व पशुयागु नां धा:सां ज्यू, ल्या: धा:सां ज्यू। १८ थ्व थुइकेत बुद्धि मा:। सुयाके बुद्धि दु वं थ्व ल्या:यागु अर्थ थुइका काइ। थ्व ल्या: मनूयागु नां ख:। थ्व ल्या: ६६६ ख:।

भ्या:चा व छगू लाख व पीप्यद्वः
मनूत

१४ १ अले जिं सियोन पर्वतय् भ्या:चा दनाच्चंगु खना। वय्क: व वय्क:या बा:यागु नां कपालय् च्वया त:पिं छगू लाख व पीप्यद्वः मनूत वय्क: नाप दु।* २ अले यक्व ल:यागु स: व तसकं न न्या:गु

स: थें च्वंक स्वर्ग धया ह:गु छगू त:धंगु स: जिं ताल। थ्व स: यक्व वीणा था:गु स: थें नं च्वं।

३ सिंहासन, प्यम्ह जीवात्मा, व थकालिपिनिगु न्ह्यःने च्वना: इमिसं छपु न्हूगु म्ये हालाच्च्वन। पृथ्वीं मू पुला: लिफ्याना ह:पिं छगू लाख व पीप्यद्वः मनूतय्सं जक व म्ये हाले स:, मेपिन्सं मस:। ४ थुपिं मिस्त नाप लसपस मजूनिपिं च्वखपिं ख:। थुपिं भ्या:चायागु जक ल्यू ल्यू जुइपिं ख:। परमेश्वर व भ्या:चायागु लागि संसारं लिफ्याना ह:पिं दकलय् न्हापायापिं मनूत, थुपिं हे ख:। ५ इमिगु म्हुतुइ मखुगु खँ धयागु मदु, इमिगु नुग: यचुसे च्वं।*

स्वम्ह स्वर्गदूत

६ अले छम्ह स्वर्गदूत आकाशं आकाशं ब्वया जूगु जिं खना। वं पृथ्वीइ च्वंपिं फुक्क जातियापिं मनूतय्त, कुलयापिं मनूतय्त, थी थी भासं नवाइपिं मनूतय्त, व देश देशयापिं मनूतय्त न्येकेत न्ह्याबलें दयाच्च्वनिगु भिंगु खँ ज्वनावया च्वंगु दु। ७ वं ततसलं थथे धाल — “परमेश्वर खना: गया। वय्क:यात त:धंकि। वय्कलं मनूतय्त न्याय

याइगु ई वये धुंकल। स्वर्ग, पृथ्वी, समुद्र व लःयागु बुंगाः सृष्टि याना-दीम्हय्सित आराधना या।”

९ वयागु ल्यू ल्यू वःम्ह मेम्ह स्वर्गदूतं थथे धाल — “नाश जुल, तःधंगु शहर बेबिलोन नाश जुल। थःम्हं याःगु बांमलाःगु ज्या मेमेगु देशयापिं मनूतयूत नं याके ब्यूम्ह थ्व हे शहर खः।”*

१० हानं वया ल्यू ल्यू वःम्ह स्वम्हम्ह स्वर्गदूतं ततसलं थथे धाल — “सुनानं पशुयात व वयागु मूर्तियात पुजा याःसा, वयागु कपालय्, अथबाः ल्हातय् चिं तयेका चवंसा, १० अज्याःपिन्सं परमेश्वरयागु तःधंगु तं छुनं ल्वाकछयाना मतःगु ख्वल्चां त्वने माली। अज्याःपिन्सं मि व गन्धक दुथाय् पवित्रपिं स्वर्गदूततयूगु व भ्याःचायागु न्ह्यःने चवनाः सास्ति नया चवने माली।” ११ इमिसं सास्ति नया चवंथासं वःगु कुं न्ह्याबले चवय् थहां वनाचवनी। इमिसं चच्छि न्हिच्छि दुःख सिया चवने माली। व पशुयात व वयागु मूर्तियात पुजा याक्वसित, अले हानं वयागु नांयागु चिं काक्वसित नं अथे हे याइ।”*

१२ परमेश्वरयागु आज्ञा मानय् याइपिं व येशू ख्रीष्टयात विश्वास याना

मत्वःतूपिं विश्वासीतयूसं सह याः कि मयाः धकाः थुकिं हे सी दइ।

१३ अले हानं जिं स्वर्गं थथे धयाहःगु सः ताल — “थ्व खँ च्व, आवनिसें प्रभुयात विश्वास यानाः सीपिं मनूत धात्थें हे धन्यपिं खः।” आत्मां नं धयादिल — “धात्थें खः, आः इमिसं थःगु ज्यां भासु लने खनी, छायाःसा इमिगु ज्यायागु फल इमिगु ल्यू ल्यू वयाचवनी।”

पृथ्वीइ बालि लयेगु ई

१४ अले हानं जिं तुयुगु सुपाँय् खना। छेनय् लुँयागु श्रीपेच दुम्ह, ल्हातिइ ज्वःगु ईचा ज्वनातःम्ह मनूया काय् थें चवंम्ह छम्हय्सित सुपाँचय् खना।*

१५ सुपाँचय् चवंम्हय्सित देगलं पिहां वःम्ह छम्ह स्वर्गदूतं थथे धकाः ततसलं धाल — “पृथ्वीइ चवंगु बालि बांलाक पाकय् जुइ धुंकल, बालि लयेगु ई जुइ धुंकुगुलिं ईचां बालि लयादिसं।”* १६ अले सुपाँचय् चवंम्हय्सिनं पृथ्वीइ ईचा संकल, अले पृथ्वीइ बालि लये सिधल।

१७ हानं मेम्ह हे छम्ह स्वर्गदूत स्वर्गय् चवंगु देगलं पिहां वल। वयाके नं ज्वःगु ईचा दु। १८ मेम्ह छम्ह स्वर्गदूत

होम यायेगु थासं पिहां वल। थ्वयाके
मियागु अधिकार दु। अले ज्वःगु
ईचा दुम्हयसित थ्वं ततसलं धाल —
“पृथ्वीइ च्वंगु दाख ईचां लया का,
दाख पाकय जुइ धुकल।” १६ अले व
स्वर्गदूतं थःगु ईचा पृथ्वीइ संकल।
अले दाख लयाः मुंकल। थ्व यंकाः
परमेश्वरयागु तंयागु तःधंगु दाख
तिस्सिगु थासय् वांछवत। २० शहरं
पिने यंकाः दाख तिस्सिल। दाख
तिस्यूबलय् सलयागु गःपः तक जायाः
स्वसः किलोमिटर तक हि बाः वन।*

न्हय्म्ह स्वर्गदूत व न्हय्गू महामारी

१५ १ जिं हानं स्वर्गय् तसकं हे
तःधंगु अजूचायापुगु छगू
चिं खना। न्हय्म्ह स्वर्गदूततय्सं
दकलय् लिपायागु न्हय्गू महामारी
कयातल। परमेश्वरयागु तं थुमिगु पाखें
हे क्वचाइ। २ अले जिं मि ल्वाकज्याःगु
न्हाय्कंयागु समुद्र थें खना। पशु,
वयागु मूर्ति व वयागु नांयागु ल्याःयात
त्याकाः परमेश्वरं बियादीगु वीणा
कयातःपिन्त जिं न्हाय्कंयागु समुद्रय्
दनाच्वंगु खना। ३ परमेश्वरया दास
मोशां च्वयातःगु म्ये व भ्याःचायागु
छपु म्ये इमिसं थुकथं हाल —

“दक्वसिबय् तःधंम्ह व

शक्ति दुम्ह परमप्रभु परमेश्वर,

छिं यानादीगु ज्या

तसकं तःधं व अजूचायापु।

जाति जातिया जुजु,

छिगु लँपु सत्य व पाय्छि जु।*

४ हे परमप्रभु, सु जक

छि खनाः मग्याइ?

सुनां जक छिगु नांयात तःधं

धकाः मानय् मयाइ?

छि हे जक पवित्रम्ह खः।

छिगु पाय्छिगु बिचाः

व न्याय फुककसिनं

सी धुकूगुलिं

फुकक जातित छिथाय्

छितः आराधना यायेत वइ।”*

५ अनंलि जिं स्वर्गय् परमेश्वरया देगः
चालाः अन दुने च्वंगु महापवित्र थाय्
खन।* ६ यचुसे व थीगु तुयुगु वसः
फिना तःपिं अले छातिइ लुँयागु बालां
हिनातःपिं न्हय्म्ह स्वर्गदूतत देगलं
न्हय्गू महामारी ज्वनाः पिहां वःगु
जिं खना। ७ अले व प्यम्ह मध्ये छम्ह
जीवात्मां न्ह्याबलें म्वाना च्वनिम्ह
परमेश्वरयागु तं जाय्क दुगु न्हय्गः
लुँयागु ख्वल्चा न्हय्म्ह स्वर्गदूततय्त

बिल। ८ परमेश्वरयागु महिमा, हनाबना व शक्तिं पिहां वयाचवंगु कुं देगः छगलं जाल। न्हय्म्ह स्वर्गदूततय्सं छ्वया हःगु न्हय्गू महामारी सिमधतले अन सुं नं दुहां वने मफु।*

परमेश्वरया तं दुगु न्हय्गः ख्वल्चा

१६ १ अले जिं देगलं न्हय्म्ह स्वर्गदूततयत् तस्सलं थथे धयाचवंगु ताल — “हुं, परमेश्वरयागु तं दुगु न्हय्गः ख्वल्चा पृथ्वीइ प्वंकि।”

२ अले न्हापांम्ह स्वर्गदूतं वनाः थःगु ख्वल्चा पृथ्वीइ प्वंकल। थुकिं यानाः पशुयागु छाप दुपिं व पशुयागु मूर्ति पुजा याइपिं मनूतय्गु म्हय् घच्चाइपुगु व सह याये मफ्य्क स्याइगु कै वल।*

३ निम्हम्ह स्वर्गदूतं थःगु ख्वल्चा समुद्रय् प्वंका बिल। अले व समुद्रयागु लः सीम्ह मनूयागु हि थें जुयाः समुद्रय् च्वंपिं प्राणीत फुककं सित।

४ स्वम्हम्ह स्वर्गदूतं थःगु ख्वल्चा खुसि व बुंगाःचाय् प्वंकल। अले फुकक लः हि जुल।* ५ अले लःयागु बिचाः याइम्ह दूतं थथे धाःगु जिं ताल —

“हे पवित्रम्ह परमेश्वर,

न्हापांनिसें दीम्ह,
आः नं दीम्ह छि हे खः।

छिं न्याय यानादीगु
तसकं पाय्छि जू।

६ छायाःसा छितः

विश्वास याःपिं मनूतयत्
व अगमवक्तातयत्

स्याःपिं थुपिं हे खः।

उकिं छिं थुमित हि त्वंकादिल।

इपिं थथे हे याये माःपिं खः।”

७ अनं लिपा वेदीं थथे धया हःगु सः जिं ताल,

“दक्वसिब्य् तःधंम्ह
व शक्ति दुम्ह

परमप्रभु परमेश्वर,

छिं यानादीगु न्याय

सत्य व पाय्छि जू।”

८ प्यम्हम्ह स्वर्गदूतं थःगु ख्वल्चा सूर्ययात प्वंका बिल। थुकथं सूर्ययागु मि थेंज्याःगु तापं मनूतयत् पुकेबिल। ९ तसकं तांन्वयाः मनूतयत् पुत। थथे दुःखकष्ट छ्वयाहयेगु अधिकार दुम्ह परमेश्वरयागु नां कयाः इमिसं सराः बिल। अय्न् इमिसं पश्चाताप मयाः

अले परमेश्वरयात नं तःमधंकू।

१० न्याम्हम्ह स्वर्गदूतं थःगु ख्वल्चा पशुयागु सिंहासनय् प्वंकल। अले वयागु राज्य खिउँसे च्वना वन। दुःखकष्ट सह याये मफयाः मनूतय्सं वा न्ह्यल।* ११ थुकथं कै वय्काः सास्ति नका तःगुलिं इमिसं स्वर्गय् च्वंम्ह परमेश्वरयात सराः बिल। इमिसं थःपिन्सं याना जूगु मभिंगु ज्यायागु पश्चाताप मयाः।

१२ ख्वम्हम्ह स्वर्गदूतं थःगु ख्वल्चा तःधंगु यूफ्रेटिस खुसिइ प्वंकल। अले पुर्बयापिं जुजुपिं वये जीक खुसिया लः सुना वन, लँ दत।* १३ अले अजिङ्गर, पशु व फताहा अगमवक्तायागु म्हुतुं स्वम्ह ब्यांचा थेंज्याःपिं मभिंपिं आत्मात पिहां वःगु जिं खना। १४ अजूचायापुगु चिं याये फुपिं भूत आत्मात थुपिं हे खः। दक्वसिबय् तःधंम्ह व शक्ति दुम्ह परमेश्वरयागु तःधंगु दिनय् ल्वायेत थुमिसं सारा संसारय् च्वंपिं जुजुपिन्त मुंका जुइ।

१५ “होश याना च्वँ, जि खूँ थें वये। मद्यंसे न्ह्यलं चाय्का च्वंम्ह धन्यम्ह खः। वसः ज्वना

च्वंम्ह धात्थें धन्यम्ह खः,

छाय्धाःसा इपिं नांगां जुइ माली मखु। अले थःगु नांगांगु म्ह कर्पिन्त क्यने माली मखु।”*

१६ हिब्रू भासं आर-मागेड्डोन धाइगु थासय् इमिसं जुजुतय्त छथाय् मुंकल।

१७ न्हय्म्हम्ह स्वर्गदूतं थःगु ख्वल्चा फसय् प्वंकल। परमेश्वरया देगःया सिंहासनं थथे धकाः तसलं धया हल — “आः सिधल।” १८ अले अन न न्यात, हावलासा त्वल, तसकं भ्वखाय् ब्वल। मनूतय्गु सृष्टि जूसांनिसें थपाय्सकं तःधंगु व ग्यानापुगु भ्वखाय् गुबलें हे मब्वःनि।* १९ तःधंगु शहर स्वकू दला वन। देश देशय् च्वंगु शहर फुककं दुना वन। अले परमेश्वरं तःधंगु बेबिलोन शहरयात लुमंकादिल। अले वय्कःयागु ग्यानापुसे च्वंगु तंयागु ख्वल्चा वयात त्वनेत बियादिल।* २० दक्व टापु तना वन। पहाड धयागु हे मदया वन।* २१ पीगु पीगु किलो ति दुगु ततःग्वःगु प्वँ आकाशं कुतुं वयाः मनूतय्त लात। थज्याःगु प्वँ वयाः

१६:१० प्रस १०:२१ १६:१२ यशै ११:१५

१६:१५ मती २४:४३-४४; लूक १२:३६-४०; प्रका ३:३ १६:१८ प्रका ८:५; ११:१३, १६

१६:१६ यशै ५१:१७ १६:२० प्रका ६:१४

तसकं महामारी लाःगुलिं मनूतय्सं परमेश्वरयात सराः बिल, छायाधाःसा थ्व तसकं हे तःधंगु ग्यानापुगु महामारी खः।*

नां जाःम्ह वेश्या

१७ १न्हय्गः ख्वल्चा ज्वना तःम्ह स्वर्गदूत मध्ये छम्ह स्वर्गदूतं वयाः जितः थथे धाल — “थन वा, यक्व लः दु थाय् च्वंम्ह नां जाःम्ह वेश्यायात याःगु न्याय जिं छन्त क्यना बी।* २व हे नाप संसारयापिं जुजुपिन्सं व्यभिचार यानाजूगु खः। सारा पृथ्वीइ च्वंपिं मनूतय्सं व नाप भाःपी हे मफ्य्क व्यभिचार याना जुल।”*

३जि पवित्र आत्मां जाल, अले स्वर्गदूतं जितः मरुभूमिइ कुबिया यंकल। अन तसकं ह्याउँसे च्वंम्ह पशु गया च्वंम्ह छम्ह मिसायात जिं खना। व पशुयाके न्हय्गः छयं व भिपु नेकू दु। म्हय् जाय्क परमेश्वरयात सराः बीगु नां च्वयातःगु दु।* ४व मिसां तसकं थिकेगु ह्याउँसे, वँचुसे च्वंगु वसतं पुना तःगु दु। वं लुँ, हिरा, मोतीया तिसां म्ह छम्हं तिया तःगु दु। वयागु व्यभिचार याःगु घच्चायापुसे च्वंगु व

मभिंगु खं जाःगु छगः लुँयागु ख्वल्चा वं ल्हातय् कयातःगु दु।* ५वयागु कपालय् गुप्त अर्थ दुगु नां च्वयातःगु दु — “तःधंगु बेबिलोन, वेश्यातय् मां, अले पृथ्वीइ घच्चायापुसे च्वंगु ज्याखँ याना जुइपिनि मां।” ६अले जिं व मिसां येशूयात विश्वास याःपिं पवित्रपिं मनूतय्गु हिं काय्काजूगु खनाः जि छक्क जुल।

७अले स्वर्गदूतं जितः धाल — “छाय् छक्क जुया? व मिसायागु गुप्त खँ जिं छन्त कने। व मिसां गया च्वंम्हय्सिके दुगु न्हय्गः छयं व भिपु नेकू दुम्ह पशुयागु अर्थ नं कनाबी। ८व पशु न्हापा ला दुम्ह खः, आः मदु। व हे पशु तःजाःगु गालं पिहां वइतिनि। अले नाश नं जुइतिनि। संसारयात सृष्टि याये न्ह्यःनिसें जीवनयागु सफलइ नां च्वया मतःपिं मनूत व पशुयात खनाः तसकं छक्क जुइ, छायाधाःसा व पशु न्हापा दु, आः मदु, अले लिपा वइतिनि।*

९“थ्व खँ थुइकेत ज्ञान बुद्धि माः। न्हय्गः छयंया अर्थ न्हय्गू पहाड खः। गुकी व मिसा फ्यतुनाच्वंगु दु। थुपिं न्हय्मह जुजुपिं खः। १०इपिं मध्ये न्याम्ह जुजु सी धुंकल छम्ह जक

दनि। मेम्ह आः तक वःगु मदुनि। व वल धाःसा वं छुं ई तक जक राज्य याइ।

११“न्हापा दुम्ह, आः मदुम्ह पशु थ्व हे च्याम्हम्ह जुजु खः, थ्व न्हय्म्ह मध्ये छम्ह खः। थ्व नाश जुया वनी। १२छं खंगु फिपु नेकूयागु अर्थ आः तक जुजु मजूनपिं फिम्ह जुजुपिं खः। अयनं व पशु नाप नाप तुं इपिं छुं ई तक जक जूसां जुजु जुइतिनि।* १३थुपिं फुककसिनं छप्पं जुयाः थःपिनिगु अधिकार व शक्ति व पशुयात बी। १४थुपिं भ्याःचा नाप ल्वाः वइ। भ्याःचां थुमित बुका छ्वइ, छायाःसा वय्कः प्रभुतय् नं प्रभु व जुजुतय् नं जुजु खः। वय्कः नाप दुपिं सःता तःपिं, ल्यया तःपिं व विश्वास याये बहःपिं खः।”

१५अले स्वर्गदूतं जितः हानं धाल — “छं खंगु मिसाया लिक्क दुगु लःयागु अर्थ देश देशयापिं मनूत, जात जातियापिं मनूत व थी थी भासं नवाइपिं मनूतय्गु हुल खः। १६छं खंगु फिपु नेकुतिं व पशुं थ्व वेश्यायात हेला याइ। इमिसं व मिसायात नांगां याइ। अले वयागु ला नइ, अले वयात मिइ उना छ्वइ। १७परमेश्वरयागु इच्छा पूर्वकेत इपिं छप्पं जुयाः

वय्कःया वचन पूमवंतले इमिसं थःगु अधिकार व पशुयात बी, छायाःसा थ्व इच्छा परमेश्वरं हे इमिगु नुगलय् तयादीगु खः। १८छं खंम्ह मिसायागु अर्थ संसारय् च्वंपिं जुजुपिन्त राज्य याइगु तःधंगु शहर खः।”

बेबिलोन नाश जूगु

१८ १थुलि जुइ धुंकाः जिं स्वर्गं क्वहां वया च्वंम्ह मेम्ह स्वर्गदूतयात खना। व स्वर्गदूतयाके तःधंगु अधिकार दु। वयागु जलं पृथ्वी हे भल्लल थित। २व ततसलं थथे धकाः हाला हल —

“तःधंगु बेबिलोन शहर

नाश जुल, नाश जुल!

थ्व थाय् ला आः भूतत च्वनिगु

थाय् जुइ धुंकल।

मभिंपिं आत्मात,

घच्चायापुसे च्वंपिं भंगःत

च्वनिगु थाय् जुइ धुंकल।*

३छायाःसा वयागु

व्यभिचारयागु ख्वल्चां

त्वंगुलिं फुकक जात

जातियापिं मनूत

नाश जुइ धुंकल।

पृथ्वीयापिं जुजुपिन्सं



व नाप व्यभिचार यात ।
वयागु गुबलें हे पूमवनिगु
इच्छां यानाः
संसारयापिं व्यापारीत
तसकं हे धनी जुल ।”*

बेबिलोनया मालताल

४ अले जिं स्वर्ग थथे धयाहःगु मेगु सः
ताल —

“जि यःपिं मनूत,
वयाथासं पिहां वा ।
मवल धाःसा छिमिसं नं
व नाप व्यभिचार याइ ।
व लिसे पाप याये मते,
मखुसा छिमिसं व लिसे तुं
सजाँय फये माली ।”*

५ वं याःगु पाप
आकाश तक थ्यंगु दु ।

वं याःगु पाप
परमेश्वरं लुमंकादीगु दु ।*

६ वं छिमित

गथे यानातःगु खः
छिमिसं नं
वयात अथे हे या ।
वं याःगु ज्या सिबय्
निदुगं अप्वः
वयात छिमिसं नं या ।
छिमित त्वंकेत ख्वल्चाय्
तयाब्यूगु सिबय्
निदुगं अप्वः कडागु

१८:३ यशै २३:१७; यर ५१:७ १८:४ यशै ४८:२०; यर ५०:८; ५१:६,४५

१८:५ उत १८:२०-२१; यर ५१:६

वयागु ख्वल्चाय् तया ब्यु।*
 ७वं थः थःम्हं तुं तःधं जुयाः
 गुलि मोज यात,
 उलि हे छिमिसं नं वयात
 दुःखकष्ट व ख्वबि ब्यु।
 वयागु मनं थथे धाः
 ‘जि ला महारानी
 जुयाचवनागु दु।
 जि भाःत मदुम्ह मिसा मखु।
 जिं गुबलें हे नं
 दुखं चवने मालीमखु।’
 ८उकिं छन्हुं हे वयात ल्वय्,
 दुःख, आपत,
 अले अनिकाल वइ।
 अले वयात मिइ उना छ्वइ,
 छायाःसा वयात न्याय
 यानादीम्ह परमप्रभु
 परमेश्वर शक्ति दुम्ह खः।”*

९व नाप व्यभिचार यानाः मोजमज्जा
 याना जूपिं संसारयापिं जुजुपिं वयात
 उना तःगु कुं खनाः नुगः मछिकाः
 ख्वइ। १०वयात जूगु आपत बिपत
 खनाः ग्यानाः इमिसं तापाकं दनाः
 थथे धाइ —

“धिककार, धिक्कार

तसकं तःधंगु शहर!
 तसकं बल्लाःगु शहर
 बेबिलोन! घौछिं हे
 छं सजायं फये माल।”*

११संसारयापिं व्यापारीत नं इमिगु
 माल न्याइपिं मनूत मन्त धकाः
 नुगः मछिकाः ख्वइ।* १२इमिगु
 मालताल — लुं, वहः, हिरा, मोती,
 भिंगुभिंगु कापः, प्याजी रंगया कापः,
 रेसम, ह्याउँसे च्वंगु कापः, थी थी
 कथंया नस्वाःगु सिं, किसियागु
 वा, थिके थिकेगु सिं, कँय्, नँ, व
 दुरूल्वहँतं दय्का तःगु थी थी सामान,
 व* १३दालचिनि, मसला, धुपाँय्, मूर्,
 गुंगू, तुयुगु धुपाँय्, दाखमद्य, भिंगु
 चिकं, नचुगु छ्वचुं, छ्व, सा-द्वहं, फै-
 च्वले, सल व रथ, दासदासी, व मनूत
 नापं आः सुनानं न्याइ मखुत।

१४व्यापारीतय्सं थथे धाइ —

“हे बेबिलोन! छं यय्कूगु
 ततःधंगु मालताल
 फुककं तना वन।
 छंगु धनसम्पत्ति व इज्जत
 फुककं तना वने धुंकल।
 आः हानं गुबलें लुइ मखुत।”

१५ अन शहरय् व्यापार यानाः धनी
जूपिं मनूत वयात जूगु सास्ति खनाः
ग्यानाः तापाकं हे दनाः नुगः मछिंकाः
ख्वख्वं थथे धाइ — *

१६ “धिककार, धिक्कार
हे तःधंगु शहर!
भिंगुभिंगु सुति कापः, प्याजी
रंगयागु कापतं पुना च्वंम्ह,
लुं, हिरा, मोती तिसां
तिया च्वंम्ह छ हे खः!
१७ घौछिं हे थुलिमछि सम्पत्ति
फुक्क
छचालब्याल जुया वन।”

फुक्क लःजहाजया कप्तानत,
जहाजय् यात्राय् वंपिं मनूत, जहाज
चलय् याइपिं, समुद्रय् व्यापार
याइपिं फुक्कं ग्यानाः तापाक हे
च्वनाः * १८ अले व तःधंगु शहर
च्यानाः कुं थहां वया च्वंगु खनाः
थुकथं हाला हल — “थ्व थें तःधंगु
शहर गनं हे दइ मखु।” * १९ ह्वाँय्
ह्वाँय् ख्वख्वं छैनय् धू बुतुबुलाः
नुगः मछिंकाः इपिं थथे धकाः
हाल —

“धिककार, धिक्कार,
व तःधंगु शहर!
समुद्रय् जहाज चलय् याइपिं
फुक्कं वयागु धनं यानाः
तःमि जुल।

घौछिं हे व शहर नाश जुयावन।*
२० हे स्वर्गय् च्वंपिं मनूत,
व नाश जूगुलिं लय्ता!
हे परमेश्वरया मनूत, प्रेरितत
व अगमवक्तात लय्ता।
छिमित गथे याःगु खः
वयात परमेश्वरं अथे हे
न्याय यानादिल।”*

२१ अले छम्ह तसकं बल्लाःम्ह
स्वर्गदूतं तसकं तःग्वःगु घःल्वहं
थेंज्याःगु छगः ल्वहं कयाः समुद्रय्
वांछ्वया हल। अले थथे धाल —

“थुकथं हे तःधंगु बेबिलोन
शहर नचुक वांछ्वइ।
अले गुबलें हे
वयात लुइके फइ मखु।”*

२२ अले वीणा, म्ये, बाँसुरी
व तुरहीयागु सः
अन गुबलें हे न्यने दइ मखु।

१८:१५ इज २७:३१,३६ १८:१७ इज २७:२६-३० १८:१८ इज २७:३२

१८:१९ इज २७:३०-३४ १८:२० व्य ३२:४३; यर ५१:४८

१८:२१ यर ५१:६३-६४; इज २६:२१

कःमितयसं दय्कातःगु सामान नं
अन लुइके फइ मखु।

घःक्यःगु सः नं
अन गुबलें हे ताये दइ मखु।*

२३मतयागु जः नं
अन गुबलें थी मखुत।
भम्घा व जिलाजंपिनिगु सः
अन गुबलें ताये दइ मखुत।

छंथाय् व्यापार याःवइपिं
फुक्कं पृथ्वीयापिं
ततःधंपिं मनूत खः।

छंगु तन्त्रमन्त्रं जात जातियापिं
मनूतय्त भंगः लानाः
थगय् याना तल।*

२४अगमवक्तातय्गु,
परमेश्वरया मनूतय्गु
व पृथ्वीइ स्याःपिनिगु हि
अनं लुया वःगुलिं
बेबिलोन थुकथं नाश जुल।”*

स्वर्गय् छुत्काराया म्ये

१९ अनं लिपा जिं स्वर्गं यक्व
मनूत हाला
हःथेज्याःगु सः ताल,

“हल्लेलूया,
उद्धार, मान व शक्ति

भी परमेश्वरयागु हे खः।
२वय्कलं बांलाक व खःकथं
न्याय यानादी।
पृथ्वीयापिं फुक्क मनूतय्त
थः नाप व्यभिचार याकाः
स्यंकूमह व तःधंमह वेश्यायात
वय्कलं सजाँय बियादीगु दु।
वय्कलं थः दासतय्गु हियागु
पलेसा कयादीगु दु।”*

३इमिसं हानं छकः तसलं थथे
धाल —

“हल्लेलूया,
व वेश्यायात उनातःगु कुं
न्ह्याबलें थहां वनाचवनी।”*

४अले नीप्यमह थकालिपिं व
प्यमह जीवात्मा फुक्कसिनं भ्वसुलाः
सिंहासनय् फ्यतुनादीमह परमेश्वरयात
थथे धकाः आराधना यात —
“आमेन, हल्लेलूया। प्रभुयागु नां तःधं
जुया चवनेमा।”

५सिंहासनं थथे धकाः धया हल —

“वय्कःया दासत,
वय्कःयागु भय काइपिं,

तःधंपिं, चिधंपिं फुक्कसिनं,
भी परमेश्वरयात तःधंके माः।”*

भ्याःचायागु ब्याहा

६अनं लिपा हुल हुल मनूतयगु सः
थें, यक्व लःयागु सः थें, ग्राङ्गुङ्ग मिंक
न न्याःगु सः थें थथे धकाः हाला हःगु
जिं ताल —

“हल्लेलूया,
प्रभुयागु नां तःधं जुया चवनेमा।
दक्कसिबय् तःधंम्ह
व शक्ति दुम्ह
भी परमप्रभु परमेश्वरं
राज्य यानादी।”*

७भी सकसिनं लय्लय् तायाः
महिमा व हनाबना बियाः
वय्कःयात तःधंके नु।
भ्याःचायागु ब्याहा जुइन।
वय्कःया भम्चा
वय्कःयाथाय् वयेत
थः थःम्हं तुं
तयार जुयाचवने धुंकल।

८वयात तसकं प्वाला
प्वाला थीगु, यचुसे च्वंगु,
बांलाःगु सुति कापतं
पुंका तःगु दु।”

(बांलाःगु सुति कापः विश्वासीतयगु
बांलाःगु भिंगु ज्याखँ खः।)

९अले व स्वर्गदूतं जितः धाल —

“थ्व च्वया ति, भ्याःचायागु
ब्याहायागु भ्वजय् सःतूपिं मनूत
तसकं हे धन्यपिं खः।”

वं हानं धाल —

“थ्व फुक्क परमेश्वरयागु सत्य
वचन खः।”*

१०अथे धाःगुलिं वयात हनाबना
यायेत जि वयागु तुतिइ भ्वपुला।
अय्न् वं धाल — “छं थथे याये मते।
येशूयागु वचन न्यनाकाःपिं छ व छिमि
दाजुकिजापिं थें जि नं परमेश्वरया छम्ह
दास खः। परमेश्वरयात आराधना
या।” येशूयागु साक्षी अगमवक्तातयगु
आत्मा खः।

तुयुम्ह सल गयादीम्ह

११थुलि जुइ धुंकाः स्वर्ग चाल,
जिं अन छम्ह तुयुम्ह सलयात खना।
व सल गया च्वंम्हय्सित विश्वास
याये बहःम्ह व सत्यम्ह धाइ।
वय्कलं बांलाक सत्य कथं न्याय
व लडाइँ यानादी।* १२वय्कःयागु
मिखा मित्याः थें च्वं। वय्कःयागु

छेनय् यक्व हे श्रीपेच दु। वय्कःयागु
 म्हय् च्वयातःगु नां सुनानं हे मस्यू,
 वय्कलं जक स्यू।* १३वय्कलं
 हिइ थुना तःगु वसः पुनातःगु दु।
 अले वय्कःयात परमेश्वरयागु वचन
 धकाः नां तया तल। १४यचुसे च्वंगु,
 तुयुगु, बांलाःगु सुति वसतं पुना तःपिं
 स्वर्गय् च्वंपिं तुयुगु सल गया च्वंपिं
 सिपाइंत फुक्कं वय्कःया ल्यू ल्यू
 जुल। १५जात जातियापिं मनूतय्त
 स्यायेत वय्कःयागु म्हुतुं छपु तरवार
 पिहां वयाच्वंगु दु। अले वय्कलं
 इमित नँयागु दण्डीं राज्य यानादी।
 दक्वसिबय् तःधंम्ह व शक्ति दुम्ह
 परमेश्वरयागु तमं जायाच्वंगु दाख
 तिस्सिगु थासय् वय्कलं तुतिं न्हुयाः
 दाखरस पिकयादी।* १६वय्कःयागु
 वसतय् व वय्कःयागु खम्पाय् थ्व नां
 च्वयातःगु दु — “जुजुतय् नं जुजु व
 प्रभुतय् नं प्रभु।”

१७अनं लिपा जिं सूर्यलय् दना
 च्वंम्ह छम्ह स्वर्गदूतयात खना।
 आकाशय् ब्वया च्वंपिं फुक्क भंगः-
 तय्त ततसलं वं सःतल — “वा,
 परमेश्वरयागु तःधंगु भ्वय् नयेत मुं वा।
 १८जुजुपिनिगु, तःधंपिं कप्तानतय्गु,
 बल्लाःपिं मनूतय्गु, सलतय्गु, सल

गया जुइपिनिगु, फुक्क मनूतय्गु,
 दासतय्गु, दास मखुपिनिगु, तःधं-
 पिनिगु व चिधंपिनिगु ला नयेत मुं
 वा।”*

१९सल गया च्वंम्ह व वय्कःया
 सिपाइंत नाप ल्वायेत व पशु व
 पृथ्वीयापिं जुजुपिं व इमि फुक्कं
 सिपाइंत मुनावःगु जिं खना।
 २०अले व पशुयात व वया फताहा
 अगमवक्तायात ज्वन। व पशुयागु
 चिं दुपिन्त व पशुयागु मूर्तियात पुजा
 याःपिन्त चिं क्यनाः थगय् याःम्ह थ्व
 हे खः। गन्धक जक च्यानाच्वनिगु मि
 गालय् थुपिं निम्हय्सितं क्वफात।*
 २१सल गया च्वंम्हय्सिगु म्हुतुं पिहां
 वयाच्वंगु तरवारं ल्यंदनिपिं फुक्कसितं
 स्याना छ्वत। इमिगु ला नयाः फुक्क
 भंगःतय्सं प्वाः जायेकल।

शैतानयात द्वःछि दँ तक चिनातःगु

२० १अले जिं तसकं तःजाःगु
 गाःयागु ताःचा व तःपुगु
 सिखः छपु ल्हातिइ ज्वनाः स्वर्गं क्वहां
 वयाच्वंम्ह छम्ह स्वर्गदूतयात खना।
 २अजिङ्गर धाःसां ज्यूम्ह, पुलांम्ह सर्प
 धाःसां ज्यूम्ह, दुष्ट व शैतान धाःसां
 ज्यूम्हय्सित व स्वर्गदूतं ज्वनाः द्वःछि

दँ तक चिनातल।* ३अले गालय्
वांछवया: पुसा तिना: छाप तयाबिल।
द्व:छि दँ मफुतले वं जात जातियापिं
मनूतय्त थगय् मयायेमा धका: थथे
या:गु ख:। द्व:छि दँ दये धुंका: वयात
पलख त्व:ती।

४अले जिं यक्व सिंहासन व उकी
न्याय यायेगु अधिकार दुपिं फ्यतुना-
च्वंगु खना। येशूयागु साक्षीया नितिं,
परमेश्वरयागु वचनया नितिं छचं
ध्यंकूपिं नं जिं खना। इमिसं व पशुयात
व पशुयागु मूर्तियात पुजा मया:, अले
कपालय् नं, ल्हातिइ नं पशुयागु चिं
तया मत:। इमिसं म्वाना वया: ख्रीष्ट
नापं द्व:छि दँ तक राज्य यात।*

५द्व:छि दँ फुना मवंतले ल्यंदनिपिं
सीपिं म्वाना मव:, सीपिं म्वाना व:गु
थ्व न्हापांगु ख:। ६सीपिं म्वाना
व:गुली ब्वति काये दुम्ह मनू धात्थें
हे धन्यम्ह व पवित्रम्ह ख:। थुपिं हानं
सी माली मखु, बरु थुपिं परमेश्वर व
ख्रीष्टया पुजाहारीत जुयाच्वने दइ।
अले वय्क: नाप इमिसं नं द्व:छि दँ
तक राज्य याये खनी।

शैतान बूगु

७द्व:छि दँ फुइवं शैतानयात कुना
त:गु थासं त्व:ता बी। ८वं सारा

संसारय् च्वंपिं जात जातियापिं
मनूतय्त अर्थात “गोग” व
“मागोगपिन्त” भंग:लाना: ल्वाकेत
छथाय् मुंकी। इपिं समुद्रयागु फि थें
यक्व दु।* ६अले इमिसं सारा संसारय्
वना: विश्वासीतय्त व परमेश्वरयात
तसकं य:गु शहरयात घेरा तल। अले
स्वर्ग मि कुतुं वया: इपिं भस्म जुल।

१०इमित थगय् याना जूमह शैतान-
यात ज्वना: गन्धकयागु मि गालय्
क्वफाना बिल। पशु व फताहा
अगमवक्तायात नं अन हे क्वफाना
त:गु दु। इमित अन सदां चच्छि
न्हिच्छिं सास्ति याना तइ।

दक्वसिबय् लिपायागु न्याय

११अनं लिपा जिं त:धंगु तुयुगु
सिंहासन व उकी फ्यतुना च्वंम्हय्-
सित खना। वय्क:यात खना:
आकाश व पृथ्वी मदया वन। अले
इमित च्वनेत गनं हे थाय् मन्त।
१२अले जिं सिंहासनयागु न्ह्य:ने
त:धंपिं व चिधंपिं सीपिं दनाच्वंगु
व सफूत पुइका त:गु खना। मेगु छगू
सफू नं पुइकल, थ्व सफू जीवन-
यागु सफू ख:। अले इमिसं या:गु
ज्या स्वया: जीवनयागु सफुलिइ
चवया त:थें सीपिं फुक्कसित न्याय

यात। * १३ समुद्रं समुद्रय् सीपिं फुक्कं
लित बिल, मृत्यु व पातालं सीपिं
फुक्कं लित बिल। थुकथं इमिसं
याना वःगु थः थःगु ज्या स्वयाः
इमित न्याय यात। १४ अले मृत्यु व
पातालयात नं मि गालय् वांछ्वल।
थ्व मि गाः धयागु हे निकः सीगु
खः। १५ जीवनयागु सफुलिइ नां
चवया मतःपिं फुक्कसितं मि गालय्
वांछ्वल।

न्हूगु स्वर्ग व न्हूगु पृथ्वी

२१ १ थुलि जुइ धुंकाः जिं न्हूगु
स्वर्ग व न्हूगु पृथ्वी खना।
न्हापायागु स्वर्ग व पृथ्वी मदया वने
धुंकल। समुद्र द हे मन्त। * २ न्हूगु
पवित्रगु यरूशलेम शहर स्वर्ग परमेश्वर
पाखें क्वहां वयाच्वंगु जिं खना।
थ्वयात बिया छ्वयेत्यंम्ह भमचायात
थें समाः याना तःगु दु। *

३ सिंहासनं तःसलं थथे धकाः
धया हःगु सः जिं ताल — “स्व,
आः परमेश्वर मनूत लिसे दी। वय्कः
इपिं नाप हे च्वनादी। इपिं वय्कःया
मनूत जुइ। परमेश्वर थः हे इमि

परमेश्वर जुयाः इपिं लिसे च्वनादी। *
४ वय्कलं इमिगु मिखाय् च्वंगु ख्वबि
सुचुक हुयादी। आः अन इपिं सी
माली मखुत, दुःखं च्वने म्वाःल,
ख्वय् म्वाःल, अले छुं नं दुःख जुइ
मखुत। पुलांगु ज्याखँ फुक्कं मदया
वने धुंकल।”*

५ अले सिंहासनय् फ्यतुनादीम्हय्सिनं
धयादिल — “स्व, जिं फुक्कं न्हूगु
याना बी।” वय्कलं हानं धयादिल —
“थ्व च्वया ति, छायाःसा थ्व
फुक्क वचन विश्वास याये बहःगु खः,
अले सत्य नं खः।” ६ वय्कलं जितः
धयादिल — “आः सिधल। अल्फा
व ओमेगा जि हे खः। सुरु व अन्त
जि हे खः। प्याचाःपिन्त जिं जीवनया
बुंगाःयागु लः सितिकं त्वंके। *
७ त्याकावइपिन्त थ्व हे अंश दइ। जि
वया परमेश्वर जुइ, अले व जिम्ह काय्
जुइ। *

८ “भुस्याःत, विश्वास त्वःतूपिं,
घच्चायापुगु ज्या याइपिं, मनू स्याइपिं,
व्यभिचार याइपिं, धामि भाँक्री ज्या
याइपिं, मूर्ति पुजा याइपिं व मखुगु खँ
ल्हाइपिं फुक्कसितं गन्धकयागु मि

२०:११-१२ दान ७:६-१० २१:१ यशै ६५:१७; ६६:२२; २ पत्र ३:१३

२१:२ यशै ५२:१; ६१:१०; प्रका ३:१२ २१:३ इज ३७:२७; लेवी २६:११-१२

२१:४ यशै २५:८; ३५:१०; ६५:१६ २१:६ यशै ५५:१

२१:७ २ शमू ७:१४; भज ८६:२६-२७

गालय् वांछ्वइ। निकः सीगु धाःगु
थ्व हे खः।”

न्हूगु यरूशलेम

६दुःखकष्ट दुगु ख्वल्चा ज्वनातःपिं
न्हय्मह स्वर्गदूतत मध्ये दक्वसिबय्
लिपायागु दुःखकष्ट दुगु ख्वल्चा
कयातःमहय्सिनं वयाः जितः थथे
धाल — “थन वा, जिं छन्त भम्चा
क्यनाबी। व भम्चा भ्याःचाया कलाः
खः।”

१०जि आत्मां जाल, अले स्वर्गदूतं
जितः तःधंगु तःजाःगु पर्वतय् यंकाः
परमेश्वरदीगु स्वर्गं क्वहां वयाच्वंगु
पवित्रगु शहर यरूशलेम क्यन।*
११व शहर परमेश्वरयागु जलं भल्लल
थिनाच्वन, अले तसकं थिकेगु मणि
थी थें फुककं खने दय्कः भल्लल
थिनाच्वन। १२थ्व शहरय् तःग्वःगु
तःजाःगु पःखालं दना तःगु दु। थ्व
पखालय् भिनिद्वाः ध्वाखा तथा तःगु
दु। ध्वाखाय् भिनिमह स्वर्गदूतत
च्वनाच्वन। इस्राएलीतय् भिनिगू
कुलयागु नां उपिं ध्वाखाय् च्वया तःगु
दु। १३पुर्व पती स्वद्वाः ध्वाखा, उत्तर
पती स्वद्वाः ध्वाखा, दच्छिन पती
स्वद्वाः ध्वाखा व पच्छिम पती स्वद्वाः

ध्वाखा।* १४शहरया पःखाःयागु जग
भिनिथाय् दु। उकी द्यःने भ्याःचाया
भिनिमह प्रेरिततय्गु नां च्वया तःगु दु।
१५जि नाप खँ ल्हाःमहय्सिके शहर,
ध्वाखा व पःखाः नापय् यायेत लुँयागु
गज दु।* १६शहर प्यकू लाः। हाकः
व ब्या उति हे दु। अले वं थःगु गजं
शहर नापय् याना स्वःबलय् निद्वः व
प्यसः किलोमिटर हाक दु। ब्या व
जाः नं उलि हे दु। १७शहरयागु पःखाः
नं नापय् याना स्वःबलय् खुइगु मिटर
दु।

१८पःखाः जास्परं दयेका तःगु खः।
शहर न्हाय्कं थें यचुसे च्वंगु लुं दय्का
तःगु खः। १९पःखाःयागु जग तःजिगु
थी थी मणि, हिरा, मोतीं बांलाका
तःगु दु। न्हापांगु जास्परयागु, निगूगु
निलमयागु, स्वंगूगु हरितयागु, प्यंगूगु
पन्नायागु, २०न्यागूगु आनिक्सयागु,
खुगूगु कार्नेलेनयागु, न्हय्गूगु गोमेड-
यागु, च्यागूगु पिरोजायागु, गुंगूगु
पुष्पराजयागु, भिगूगु लसुनेयागु,
भिंछगूगु यूयागु, भिनिगूगु कटेलायागु
खः।

२१व भिनिद्वाः ध्वाखा भिनिगः
मोतीयागु खः। छद्वाः ध्वाखा छगः
मोतीं दय्का तःगु खः। शहरयागु लँ

न्हाय्कं थें यचुसे च्वंगु मुक्कं लुँयागु
दय्का तःगु खः।*

२२ अन शहरय् जिं देगः छगः हे
मखना। अनयागु देगः हे दक्वसिबय्
तःधंम्ह व शक्ति दुम्ह परमप्रभु परमेश्वर
व भ्याःचा खः। २३ उकिं अन शहरय्
भल्लल थीकेत सूर्य नं म्वाः तिमिला
नं म्वाः।* परमेश्वरया महिमां हे व शहर
भल्लल थ्यू। अनयागु मत भ्याःचा
थः हे खः। २४ थुकियागु जलय् जात
जातियापिं मनूत जुइ। अले संसारयापिं
जुजुपिन्सं थःगु सम्पत्ति व महिमा अन
हे हइ।* २५ अनयागु ध्वाखा गुबलें
हे ती मखु। अन चा धयागु द हे म्दु।
२६ जात जातियापिं मनूतय्सं थःगु
महिमा व हनाबना दक्वं अन हे हइ।*
२७ पवित्र मजूगु छुं हे अन दुकाइ मखु।
घच्चायापुसे च्वंगु ज्याखँ याना जुइपिं,
अथबाः मखुगु खँ ल्हाना जुइपिं सुं
हे अन दुकाइ मखु। भ्याःचायागु
जीवनयागु सफुलिइ च्वया तःपिं
मनूतय्त जक अन दुकाइ।*

जीवन बीगु खुसि

२२

१ अले स्वर्गदूतं जितः
स्फटिक थें यचुसे च्वंगु

अनन्त जीवन बीगु लः दुगु खुसि
क्यना बिल। थ्व खुसि परमेश्वर व
भ्याःचायागु सिंहासनं पिचायाः* २ उगु
शहरयागु लँ दथुं न्ह्यानाच्वंगु दु। थ्व
खुसि सिथय् भिंनिलाया भिंनिता हे
फल सइगु जीवनयागु सिमा दु। थ्व
सिमाय् लच्छिइ छता फल सइ। थ्व
सिमायागु हः जात जातियापिं मनूतय्त
लाय्केगु नितिं वासः खः।*

३ अन सराः बिया तःगु छुं हे नं दइ
मखुत।* परमेश्वर व भ्याःचायागु
सिंहासन अन दइ। अले वय्कःया
दासतय्सं वय्कःयात आराधना याइ।
४ इमिसं वय्कःयागु रूवाः स्वये दइ।
वय्कःयागु नां इमिगु कपालय् च्वया
तःगु दइ। ५ अन चा धयागु हे दइ
मखु। इमित मतयागु जः व सूर्ययागु
जः माःगु मखुत। परमप्रभु परमेश्वरं हे
इमित जः बियादी। इमिसं न्ह्याबलें
राज्य यानाच्वनी।*

प्रभु येशू हानं भाइ

६ अले स्वर्गदूतं जितः धाल — “थ्व
वचन फुक्कं सत्य व विश्वास याये
बहःगु खः। अगमवक्तातय्त आत्मा
बियादीम्ह परमप्रभु परमेश्वरं थः

२१:१८-२१ यशै ५४:११-१२ २१:२३ यशै ६०:१६-२० २१:२४ यशै ६०:३

२१:२५-२६ यशै ६०:११ २१:२७ यशै ५२:१; इज ४४:६ २२:१ इज ४७:१; जक १४:८

२२:२ उत २:६; इज ४७:१२ २२:३ जक १४:११ २२:५ यशै ६०:१६; दान ७:१८

दासतयूत याकनं जूवइगु खँ क्यनेत
थः दूत छ्वयाहयादीगु दु।”

७ येशू धयादिल —

“जि याकनं हे वये त्यनागु
दु। थ्व सफुलिइ च्वया तःगु
अगमवाणी फुक्कं न्यनाः
थुइकाः मानय् यानाच्वनिम्ह
धात्थें धन्यम्ह खः।”

८ थ्व खंम्ह व ताःम्ह जि यूहन्ना खः।
जिं थथे स्वये धुंकाः व न्यने धुंकाः
थ्व फुक्क क्यना ब्यूम्ह स्वर्गदूतयात
हनाबना यायेत भ्वपुला। ९ वं जितः
धाल — “छं थथे याये मते। छ व
छिमि अगमवक्ता दाजुकिजापिं व
थ्व सफुलिइ च्वंगु वचन मानय् याना
च्वंपिं थें जि नं छम्ह परमेश्वरया दास
खः। परमेश्वरयात आराधना या।”

१० वं जितः हानं थथे धाल — “थ्व
सफुलिइ च्वया तःगु अगमवाणी
सुचुका तये मते, छायाःसा ई
न्ह्यःने थ्यने धुंकल। ११ मभिंगु ज्या
याइम्हय्सित मभिंगु ज्या हे याका ति।
घच्चायापुगु ज्या याना जुइम्ह अभ
घच्चायापुगु ज्या याना जुयाच्वनेमा।

बांलाःगु भिंगु याना जुइपिन्त अभ नं
बांलाःगु भिंगु याका हे ति। पवित्रपिन्त
अभ पवित्र जुइका ति।”*

१२ “स्व, जि याकनं हे
वयेत्यनागु दु। मनूतयूगु ज्या
स्वयाः जिं इमित बीमाःगु
इनाम बी।* १३ अल्फा
व ओमेगा जि हे खः।
न्हापायाम्ह व लिपायाम्ह,
अले सुरु व अन्त जि हे
खः।” *

१४ थः थःगु वसः हियाः यचुसे
च्वंक च्वना च्वनिपिं धन्यपिं खः।
जीवनयागु सिमाय् सःगु फल इमिसं
नये खनी, अले इपिं ध्वाखां दुने
शहरय् नं वने खनी।* १५ शहरं पिने
धाःसा घच्चायापुगु ज्या याइपिं,
जादु क्यनिपिं, व्यभिचार याइपिं,
ज्यानमारात, मूर्ति पुजा याइपिं, मखुगु
ज्याखँ यायेगु यय्कीपिं व मखुगु
ज्याखँ जक याना जुइपिं दइ।

१६ “मण्डलीतयूत थ्व खँ
धाय्केत जि येशू छंथाय् जिम्ह

स्वर्गदूत छ्वया हयागु खः। जि
दाऊदया कुल व सन्तान खः।
सुथय् थीगु नगु नं जि हे खः।”*

१७ आत्मा व भम्चां धयादी —
“भासँ।” अथे हे न्यनिपिन्सं नं
“भासँ” धकाः धा। प्याचाःपिन्सं व
इच्छादुपिन्सं वयाः जीवनयागु लः
सितिकं त्वँ।* १८ थ्व सफुलिइ च्वया
तःगु अगमवाणी न्यंपिं फुक्कसितं जिं
ख्याचवः बी — सुनानं थुकी छुं खँ तन
धाःसा वयात परमेश्वरं थ्व सफुलिइ

च्वयातःगु महामारी तनादी। १९ सुनानं
थ्व अगमवाणीयागु सफुलिइ च्वंगु छुं
वचन लिकाल धाःसा परमेश्वरं वयागु
जीवनयागु सिमायागु फलया भाग नं
मदय्कदी। अले वयात पवित्र शहरं
पितिनी।*

२० थुकियागु साक्षी बियादीम्हय्सिनं
धयादिल “धात्थें हे जि याकनं
वयेत्यनागु दु।”

आमेन, भासँ हे प्रभु येशू।

२१ प्रभु येशूयागु दया माया
फुक्कसित दयेमा। आमेन।